

四庫全書

史部

欽定四庫全書

史部
姑蘇志卷八

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李斯咏

謄錄監生_臣章玉輅

欽定四庫全書

姑蘇志卷七

明 王鏊 撰

沿革

吳自太伯開國迄今幾三千年中間離合升降損益治亂有可言者叙諸首使來者得觀焉

蘇州府治吳禹貢揚州之域至周泰伯讓國來奔

在今無錫

梅里始號句吳武王克殷因以封其後至壽夢益大諸

樊南徙吳闔閭始築城都之吳亡其地入越楚滅越

以其地封春申君秦置會稽郡治吳項梁起兵吳中
遂有其地漢高祖六年立從兄賈為荊王更會稽為
荊國都吳及賈被殺國除復為會稽郡十二年以封

兄子濞誅國除復為郡

盧志云濞誅屬江都王再屬廣陵王按漢書地里志

會稽郡註云景帝時屬江都又廣陵國註云江都
廣陵王皆都此并得郭郡而不得吳未知孰是元

封元年東越平以其地來屬而立東部都尉

後徙章安陽朔

初徙鄞又徙句章順帝時分浙江以西為吳郡領縣十三

吳海

鹽烏程餘杭毘陵丹徒曲阿以東為會稽郡還治山
由拳永安富春陽羨無錫婁

陰三國為吳郡領縣十五

吳婁海鹽嘉興富春建德桐廬新昌鹽官新城陽羨

永安臨水烏程餘杭

寶鼎元年割陽羨永安餘杭臨水烏程屬

吳興郡晉太康元年屬揚州刺史四年割吳縣置海

虞縣統縣十一

吳嘉興海鹽鹽官錢塘富春桐廬建德壽昌海虞婁

與吳興丹

陽號三吳二年分置毗陵郡東晉為吳國置內史行

太守事宋永初中罷吳國仍為郡領縣十二

仍有新城

嘉中以揚州浙江西屬司隸校尉大明七年割屬南

徐州八年屬揚州齊因之梁初分婁縣地置信義郡

侯景之亂改吳州尋復為郡陳永定二年割鹽官海

鹽屬海寧郡禎明元年分置吳州以錢塘為屬郡隋

開皇九年改蘇州

以姑蘇山為名

領縣五

吳崑山常熟烏程長城

十一

年移治橫山

即今新郭

大業初復改吳州三年仍改吳郡

隋初郡隸揚州行臺大業末隸徐州總管

隋末劉元進沈法興李子通相

繼據之唐武德四年復為蘇州置總管六年輔公祐

陷之七年平公祐置都督蘇湖杭暨四州州復舊

治九年罷都督屬潤州貞觀元年隸江南道神龍二

年隸本道巡察使景龍二年隸按察使景雲二年隸

揚州都督開元二十一年置採訪使為江南東道理

所天寶元年改吳郡尋復為州

從此通稱為蘇州吳郡

乾元元

年屬浙江西道節度使二年置長洲軍

大歷五年廢

永泰

元年改節度為處置觀察使

治蘇

大歷十三年為雄州

領縣七

吳長洲嘉興海鹽常熟崑山華亭

黃巢之亂錢鏐奄有浙西

光啟三年六合鎮將徐約攻陷蘇州龍紀元年鏐遣

其弟鉉討約破走之大順元年七月楊行密將李友

陷蘇州九月孫儒圍蘇州十一月陷之殺李友二年
鏐復平蘇州乾寧三年楊行密將臺濠陷蘇州五年
鏐討平之梁開平二年楊行密復圍蘇州三年鏐復
討平之割吳縣地置吳江縣後唐同光二年升中吳
軍晉天福三年析嘉興置崇德縣四年置秀州宋開
寶八年改平江軍節度仍為蘇州屬江南東道太平
興國三年錢俶納土屬兩浙路置轉運使熙寧五年徙杭熙
寧七年屬浙西路政和五年升平江府以徽宗嘗節鎮宣和

五年置浙西提舉司建炎四年置浙西提點刑獄

司並治於此嘉定十年割崑山地置嘉定縣凡領

縣六

吳長洲崑山常熟吳江嘉定

元至元十二年以府治為江

淮行省以提刑司為兩浙大都督府置浙西路軍

民宣撫司十四年改宣撫司為平江路總管府改

浙西路為浙西道而屬江淮行省在城四廂設置

錄事司以治之十八年升平江路達魯噶齊總管

府二十六年改江淮行省為江浙行省移治杭州

至正十六年張士誠據之改隆平府十七年復為
平江路國朝吳元年改蘇州府直隸中書省今隸
南京洪武八年以揚州崇明縣來屬弘治十年又割
崑山常熟嘉定地置太倉州今領州一曰太倉縣七

曰吳長洲崑山常熟吳江嘉定崇明

吳地古今稱謂不一句吳泰伯

始稱漢書註句者吳俗之發聲○吳中項羽傳舉吳
中兵○吳下灌嬰傳破吳縣長吳下○吳門見李德
裕文指潤州為吳之門戶○舊吳沈休文安陸王碑
文鴻騫舊吳又劉琨勸進表奄有舊吳○大吳吳縣
鄉名○全吳梁簡文帝浮海石像銘云長處全吳今
崑山有全吳鄉長洲有全吳里○中吳後唐升州為

中吳軍節度吳越時稱中吳府○吳會古有其語自唐以來稱者多指平江意謂為東南一都會今郡有吳會亭吳會坊皆然實誤也觀史記漢書所載皆指吳越而言耳如吳王濞傳上患吳會輕悍時固未分會稽為吳郡故舉二地合稱之至吳郡既立稱者相因若曹子建詩云行行至吳會吳會非我鄉諸葛孔明云東連吳會蔡邕傳云遠蹤吳會謝承後漢書施延傳云吳會未分吳張紘謂收兵吳會王羲之時賦役繁重吳會尤甚石崇曰吳會僭逆莊子釋文浙江為吳會分界亦皆指二浙之地朱桓傳云部伍吳會二郡齊太祖手詔吳會二郡以禮迎遣褚伯王六朝亦有下吳會兩郡造船此類甚多證據尤明切也○三吳說者不同十道四蕃志通典元和郡國圖志並以吳郡丹陽吳興為三吳又以義興吳郡吳興為三吳鄺道元水經云永建中陽羨周嘉上書以縣遠赴會至難求得分置遂以浙江西為吳東為會稽分為

三號三吳即吳興吳郡會稽也按晉書咸和三年蘇峻反吳興太守虞譚與庾冰王舒等起義兵於三吳時冰為吳郡舒為會稽則是吳郡吳興會稽為三吳矣又安帝隆安三年孫恩陷會稽劉牢之遣桓寶率師救三吳又陶回為吳興太守時大饑三吳尤甚回開倉賑之及割府庫軍資以救乏絕詔會稽吳郡依回賑卹據此則與水經正合又虞譚傳譚為吳興太守詔加譚督三吳晉陵宣城義興五郡事孝武帝寧康二年太后詔曰三吳與壤水旱併臻宜時拯卹三吳義興晉陵及會稽遭水之縣全除一年租以此兩事考之則義興固在三吳之外而太后之詔亦不在三吳之數豈一時稱謂初無定說邪史傳各有詳簡差互邪或疑虞譚所督三吳晉陵宣城義興計六郡而稱五郡蓋譚自為吳興增督五郡丹陽其一也桓寶救三吳者以孫恩既陷會稽遂逼吳中故云今當以十道四蕃志及郡國志別說為正又陸廣微吳地

記以金陵為中吳鄂州為南吳武昌為下吳即三吳也地理指掌圖三吳今蘇潤湖州亦據吳丹陽吳興三郡而言也○東楚史記貨殖傳彭城以東東海吳廣陵為東楚孟康曰舊名吳為東楚

吳縣附郡城西秦為會稽郡置吳縣王莽改名泰德隋開皇九年楊素移治橫山東唐武德七年復舊開元四年升望縣今管里五百一十一

長洲縣附郡城東唐萬歲通天元年分吳縣之北境置

以長洲苑名

乾元二年改長洲軍大厯五年仍為縣十二

年升望又割吳地置華亭縣今管里七百四十一

崑山縣在府東七十里秦漢婁縣地

以婁江名

相傳其城吳

子壽夢所築

或云在漢為膠縣後避錢鏐諱改今名又吳志張昭封婁侯或云改於王莽時

梁天監六年分置信義縣屬信義郡

今縣西二十里村曰信義疑古

縣治俗又訛為真義

大同初又分置崑山縣

以東有崑山名

隋開皇九

年廢十八年復置唐天寶十載太守趙居貞奏分縣

之南境及嘉興海鹽二縣地入華亭縣大厯十二年

升緊會昌四年升望後析安亭等五鄉隸嘉定元元

貞元年升州國朝洪武二年復改為縣管里三百三

十八

常熟縣

以其地豐稷故名

在府北一百五里晉太康四年分吳

縣之虞鄉置海虞縣

以虞山名一云海嵎以東臨海故也

梁天監六年

置信義郡大同六年始置常熟縣隋廢信義郡并所

領海陽前京信義海虞興國南沙入常熟又廢晉陵

郡於常熟置常州後割入蘇州唐武德七年移治海

虞城

今縣是也

元元貞二年升州國朝洪武二年復為縣

管里五百一十四

吳江縣在府東南四十五里舊吳縣松陵鎮也五代梁
開平三年析吳縣地置吳越於此立南北兩城防遏
使所元元貞二年升州國朝洪武二年復為縣管里
五百六十二

嘉定縣在府東一百四十里故為崑山之嚆城鄉宋嘉
定十年知府趙彥橚奏割崑山縣安亭等五鄉於練
新市置縣元元貞二年升州國朝洪武二年復為縣
管里六百六十八

太倉州在蘇州府東一百六里古婁縣之惠安鄉相傳
春秋時吳王於此置倉故名或云吳王濞也或云孫
權和好於遼公孫淵置倉於此宋時置節制司酒庫
元創海運海外番舶皆於此市易俗謂六國馬頭元
貞二年升崑山縣為州徙治太倉至正十三年立水
軍萬戶府十六年張士誠據吳始城之州復徙崑山
國朝吳元年立太倉衛洪武十二年又立鎮海衛弘
治十年始割崑山之新安惠安湖州三鄉常熟之雙

鳳鄉嘉定之樂智循義二鄉置為州凡三百一十二里領縣一曰崇明

崇明縣在府東三百一十四里海中唐武德間海中湧

二洲

今東西二沙

宋時續漲姚劉沙與東沙接壤

即崇明舊治

建中靖國初又漲一洲於西北

即今之三沙

嘉定中置鹽

場號曰天賜舊屬通州海門縣元至元十四年升州

隸揚州路國朝改為縣洪武八年以其地來屬管里

一百一十

分野

先儒謂古者受封之月歲星所在之辰其國屬焉
或謂以其州之星土為國之分星稽諸載籍多有
異同姑從舊志所存是訂而次第之

黃帝分星次斗十一度至婺女七度曰須女又曰星紀
於辰在丑謂之赤奮若於律為黃鐘

周禮保章氏鄭玄註云星紀吳越也

春秋緯文耀鉤云蒙山以東至南江會稽震澤徐揚州

屬權星

爾雅星紀斗牽牛吳分野

史記天官書二十八舍主十二州吳楚之疆候在熒惑

占為鳥衡

正義云熒惑鳥衡皆南方之星鳥衡柳星也或曰張也

西漢天文志斗江湖牽牛婺女揚州地理志吳地斗

分越地牛女分

費直分星次斗十度至女五度為星紀於辰在丑吳越

分野

蔡邕分星次斗六度至須女二度謂之星紀大雪冬至
居之吳越分野

皇甫謐帝王世紀云星紀自斗十一度至女七度吳越
分

陳卓范蠡鬼谷張良諸葛譙周京房張衡分星次分野
斗牽牛須女吳越揚州九江入斗一度廬江入斗六
度豫章入斗十度丹陽入斗十六度會稽入斗一度
臨淮入斗四度廣陵入斗八度泗水入女一度六安

入女六度

晉天文志南斗十二度至須女七度為星紀

唐一行所分星次分野南斗牽牛星紀之次也丑初起

斗九度

餘千四十二
秒十二太

中斗二十四度

一千七百八半

終女四

度其分野自廬江九江負淮水之南盡臨淮廣陵至

于東海又逾南河得漢丹陽會稽豫章郡西濱彭蠡

南涉越州盡蒼梧南海古吳越及東南百越之國皆

星紀分也南斗在雲漢之流殷淮海之間為吳分牽

牛在南河浸遠故其分野自豫章東達會稽南逾嶺
徼為越分

陳氏曰春秋占相以歲所在為福歲所衝為災故歲在

越而吳不利

按左傳昭公三十二年吳伐之必受其凶釋者以為越得歲而吳伐之

歲在星紀此星紀為越之分星而揚州之星土也符堅將謀晉引羣臣會議符融曰歲鎮斗牛吳越之福石越曰今歲鎮星守牛斗福德在吳懸象無差未可犯也及堅入寇果敗

宋兩朝天文志天市垣二十二星東西各列十一星其
東垣南第六星曰吳越

國朝清類分野書吳分野斗牛在丑自斗三度至女一度屬吳越分揚州今兩浙蘇皆吳分也

疆域

蘇財賦甲天下然其土壤不甚廣也況江湖之間水居其半焉觀其疆域可以知

唐蘇州吳郡領縣七東西四百三十九里南北三百三

十里

東至海三百六里南至吳興郡三百一十里西至晉陵郡義興縣界一百三十三里北至晉陵

郡二百里東南到東海釗山四百五里西南到吳興郡二百二十里西北到晉陵郡一百九十五里東

北到常熟縣界三百二十
十九里出杜氏通典

宋平江路領縣六東西三百二十五里南北三百里

東至

海二百二十里西至常州界一百三十二里南至秀
州界一百一十里北至江一百八十里東南到秀州
界一百五十里西南到湖州烏程縣界一百三十里
東北到海二百三十里西北到常州界五十里以烏
角溪為界

元平江路領州四倚郭縣二錄事司一東西三百二十

五里南北三百里

東至海二百二十里西至無錫州
一百三十二里南至嘉興縣一百

一十里北至江一百八十里東南到嘉興縣一百五
十里西南到烏程縣界一百三十里東北到海二百

三十里西北到無錫州界五十里

國朝為蘇州府領縣七東西五百四里南北四百二里

東至崇明縣三百一十四里到海渺無邊岸西至常州府宜興縣界一百里到宜興縣一百九十里南至嘉興府嘉興縣界九十四里到嘉興府一百三十里北至揚州府通州界一百五十里到通州二百七十里東南至松江府華亭縣界一百二十六里到松江府一百八十里東北至常熟縣界許浦港一百七十一里到大海渺無邊岸西南至吳江縣界一百五十一里到湖州烏程縣二百一十一里西北至常州府無錫縣界四十九里到常州府一百八十九里至應天府五百八十八里至順天府三千八百里

按歷代疆域不同東至甬東西至雲婁

在今豫章廬江

楚接

南至于越

干今餘

父

寧今分

北至徐鍾吾橐臯

在今壽春

此春

秋吳國之境也東至句章

在今慶元

西至豫章南至南海

郡北至廣陵

秦九江郡

此秦漢會稽郡之境也東至海鹽

西至丹陽郡南至會稽北至廣陵此東漢吳郡之境

也東至海鹽西至丹陽南至會稽北至毘陵此三國

六朝吳郡之境也東至海鹽西至宣州南至杭州北

至常州此隋唐五代蘇州之境也東至華亭西至太

湖南至吳江北至江陰此宋平江府之境也東至華

亭西至無錫南至嘉興北至江陰此元平江路之境
也東至崇明西至太湖南至嘉興烏程北至江陰此
國朝蘇州府之境也

姑蘇志卷七

欽定四庫全書

姑蘇志卷八

明 王鏊 撰

山上

吳中諸山奇麗瑰絕實鍾東南之秀地理家謂其
原自天目而來發於陽山今紀自陽山分華鹿而
南迤邐天平盡於靈巖別由穹窿而東盡於楞伽
以及湖中諸山若虎丘於諸山最小而名勝特著
且非有所附麗故首列之

虎丘山在府城西北七里吳越春秋云閻閭葬此以扁
諸魚腸劍各三千為殉越三日金精結為白虎踞其
上故名唐避諱改武丘又名海湧峰遙望平田中大
崑耳比入則奇勝萬狀其最者為劍池兩崖劃開中
涵石泉深不可測相傳秦皇發閻閭墓鑿山求劍無
所得其鑿處遂成深澗今名劍池顏真卿書虎丘劍
池四字石刻猶存

宋王禹偁劍池銘并序虎丘劍池泉石之奇者也吳地記引秦皇之

事以為說說考諸舊史則無聞焉矧儒家者流不可語怪因為銘以辯之銘曰茂苑之側震澤之濊巖巖

虎丘沉沉劒池峻不可以仰視深不可以下窺我疑
乎太極作怪化工好奇水物設險山妖忌危臨其泉
也蓋取諸坎磔其石也以象乎離艮有止兆蒙無亨
期構此也難成乎險巖直恐夏后弗能導之豈惟秦
皇而能肇茲蓋其始也一氣發泄兩儀分別爭融鬪
結擊搏而裂斷壁雙揭摩雲不徹翠靄青殘挫銳而
中絕寒流下咽犇山未決雪壅雷收拗怒而曲折蹙
束湍瀨呀榘洞穴鱗翻成窟龍戰有血匪自人力蓋
從天設誰謂一拳登之維艱誰謂一勺挹之不竭池
實自然劒何妄傳我欲涉道如池之淵我欲立節如
石之堅位以道取名以節全濡筆池心勒銘山巔破
衆惑焉言余志焉宋方惟深詩雲崖竒天開蒼淵下
澄澈世傳靈劒飛山石千丈裂神蹤去不返今作蛟
龍穴是非泮難詰歲名多異說惟當清夜來靜賞潭
上月范成大石罅泓渟劒氣潛誰將樓閣若莊嚴只
知暖熟遊人眼不道蒼藤翠木嫌國朝高啟于將欲

飛出巖石裂蒼礦中間得深泉探測費修綆一穴海
通源雙崖樹交影山中多居僧終歲不飲井殺氣凜
猶在棲禽夜頻警月來照潭空雲起噓壁冷蒼龍已
何去遺我清絕境聽轉轆轤聲時來試新茗徐責闔
閭試劒處靈泉湛澄靜苔花漬餘血石色帶古礦空
山秋氣寒幽林夜光冷月明樹交壁人靜霜折綆古
懷且當置清景庶足領其前為千人坐蓋神僧竺道生講經處

大石盤陀徑畝高下平衍可坐千人唐李陽冰篆書
生公講臺四字分刻四石今失其一臺側有點頭石

上有可中亭取劉禹錫詩語本名可月今誤稱云

唐劉

禹錫詩生公說法鬼神聽身後空堂夜不扃高坐寂
寥雲漠漠一方明月可中亭方惟深生公天人師講

法花雨墮當時聽法衆片石千人坐山祇常護持山
鳥不敢浣野人心茫然傲蕩多酒過醉來不肯歸石
上省雲卧范成大聽經人散薜花深千百誰能更賞
音只好岸中披鶴氅風清月白坐彈琴國朝沈周月
夜千人石獨步一山有此座勝處無勝此羣類盡硤
出夷曠特如砥其脚插靈湫敷霞面深紫城中士與
女數到不知幾列酒即為席歌舞日喧市令我作夜
遊千載當隗始亦莫費秉燭步月良可喜月皎光潑
地措足畏踏水所廣無百步旋繞千步起一步照一
影千影千人比一我欲該千其意亦妄矣譬佛現千
界出自一毫耳及愛林木杪玲瓏殿閣倚僧窓或映
火總在蛛網裏閒閒萬響滅獨度梵然履恐有竊觀
人明朝以仙擬又有白蓮池在臺之左相傳說法時池生千

葉蓮花故名又有試劍石慙慙泉養鶴澗回僊徑石

井泉泉即張又新所品第三泉也

吳郡志云劍池傍經歲後大石井面

潤丈餘嵌巖自然上有石轆轤歲久湮廢寺僧乃以山後土井當之紹熙三年主僧如壁始淘古石井去淤泥五丈許四傍石壁鱗皴天成下連石底泉出石脉中味甘冷勝劍池郡守沈揆作屋覆之別為亭於井傍以為烹茶晏坐之所宋沈揆詩靈源一閤幾經年石上重流豈偶然漸喜行春有幽事人間初見第三泉○上方高閣倚層巒下有清泉一鑑寒更作小亭供勝覽盡收吟思入毫端范成大勸耕堂上醉高年和氣春風共靄然大士亦修隨喜供夜來古井發新泉○落紙雲烟墮翠巖一泓潭月鬪清寒鳳凰池上揮毫手卻掬山泉淬筆端沈周月夜叩僧房汲泉煮茶坐松下清啜夜叩僧房覓潤腴山童道我畚村沽未傳盧氏煎茶法先執蘇公調水符石鼎沸風憐碧觴甌甌盛月看金鋪細吟滿啜長松下若使無詩

味亦枯 晉王珣嘗據為別墅山下因有短簿祠珣記云

虎丘大勢四面周迴嶺南則是山徑兩面壁立交林
上合蹊路下通升降窈窕不卒至吳地記亦云虎丘
絕崑崙壑茂林深篁為江左丘壑之表吳興太守褚
淵嘗經遊其地淹留數日歎曰今之所稱多過其實
惟覩虎丘逾於所聞劉宋何求及弟點肖陳顧越唐
史德義並隱此山舊有東西寺即王氏二墅皆在山
下今雲巖寺在山上而二寺俱廢又有望海樓小吳

軒致爽閣陳公樓五臺山樓千頃雲閣他勝處尚多

不能悉載

陳顧野王虎丘山序夫少室作鎮以峻極而標奇太華神掌以削成而稱貴若茲山

者高不概雲深無藏影卑非培塿淺異疎林秀壁數
尋被杜蘭與苔蘚椿枝千仞挂藤葛與縣蘿曲澗潺
湲脩篁蔭映路若絕而復通石將頽而更綴抑巨麗
之名山信大吳之勝壤若乃九功六義之興依永和
聲之製志由興作情以詞宣形言諧於韶夏氏文暢
於鍾律由來尚矣未有登高能賦而韜斐麗之章入
谷忘歸而忽鏗鏘之節故總轡齊鑣競雕虫於山水
雲合霧集爭歌頌於林泉于時風清遠谷景麗修巖
蘭珮堪紉故繩可索林花翻灑乍飄颻於蘭皋山禽
轉響時弄聲於喬木班草班荆坐礚石之上濯纓濯
足就滄浪之水傾縹緲而酌旨酒剪綠葉而賦新詩
肅爾若與三逕齊蹤鎗然似共九成偕韻盛矣哉聊

述時事寄之翰墨陳張種與沈炯書虎丘山者吳嶽
之神秀者也雖復峻極異於九天隱嶠殊於太一襟
帶城隅獨超衆嶺控繞川澤顧絕羣岑若其峯崖刻
削窮造化之瑰詭絕澗杳冥若鬼神之髣髴珍木靈
草茂瓊林與碧葉飛禽走獸必負義而膺仁是以歷
代高賢輕輿輶栖託梵臺雲起寶刹星懸自非玉牒開
精金祥緇耀豈其神怪若此者乎沈炯答書若乃三
江五湖洞庭巨麗寫長洲之茂苑登九曲之層臺山
高水深雲蒸霧吐其中之秀異者寶虎丘之靈阜馬
冬桂夏柏長蘿脩竹靈源秘洞轉側超絕澗深崖
交羅戶穴唐獨孤及夜宴序方今內有夔龍臯伊以
佐百揆外有方叔召虎以守四海天下之人高枕無
事則琴壺以宴朋友笑歌以展霞月吾黨之職也我
是以有今茲虎丘之會巖巖虎丘莫吳西門宰然如
香樓金道自下方而踣鑠丹霞白雲於蓮宮之內會
之日和氣滿谷陽春逼人巖煙掃除肅若有待余與

夫不亂行於鷗鳥銜流霞之杯而羣嬉乎其中笑向
碧潭與松石道舊兒飢既發賓主醉止狂歌送酒坐
者皆和吳趨數奏雲去日沒梵天月白萬里如練松
陰依依狀若留客于斯時也挽雲山為我輩視竹帛
如草芥頽然樂極衆慮皆遣於是奮髯屢舞而嘆今
夕何夕同者八人醉罷皆賦以為此山故事陳張正
見從永陽王遊虎丘山詩滄波壯鬱島洛邑鎮崇芒
未若茲山麗招曉擅水鄉地靈侔少室塗難像太行
重巖標虎踞九曲峻羊腸溜深澗無底風幽谷自涼
杳沉餘玉氣劍隱絕星光白雲多異影丹桂有藂香
遠看銀臺竦洞塔耀山莊瑞草生金地天花照石梁
清遠道士同沈恭子游虎丘我本長路周遭惟歷秦
漢四瀆與五嶽名山盡幽竈及此客區中始有近峯
翫近峯何鬱鬱平湖渺瀰漫吟挽川之陰步上山之
岸山川共澄徹光彩交凌亂白雲翳欲歸青松忽消
半客去川鳥靜人來山鳥散谷深中見日崖幽曉非

旦聞子盛游遨風流足詞翰嘉茲好松石一言常累
嘆勿謂余鬼神忻君共幽贊顏真卿刻清遠道士詩
因而繼作不到東西寺于今五十春羯來從舊賞林
壑宛相親吳子多歲日泰皇厭勝辰劍池穿萬仞盤
石坐千人金氣騰為虎琴臺化若神登壇仰性一捨
宅嘆珣珉中嶺分雙樹迴巖絕四隣窺臨江海接崇
飾四時新客有神仙者於茲雅麗陳名高清遠峽文
聚斗牛津迹異心寧間聲同質豈均悠然千載後知
我挹光塵李德裕追和茂苑有靈峯嗟余未游觀巖
山在平陸壞谷為高岸岡繞數仞牆巖潛千丈幹乃
知造化意回幹資奇翫錫騰昔虎踞劍浚常龍煥潭
黛入海底峯峯聳霄霄半層巒未昇日哀狖寧知旦綠
篠夏凝陰碧林秋不換冥搜既窈窕迴望何蕭散川
晴嵐氣收江春雜英亂逸人綴清藻前哲留篇翰共
和衣玉音皆舒文繡段難追彥回賞徒起興公嘆一
夕如再升含毫星斗爛皮日休追和清遠道士詩并

序虎丘山有清遠道士詩一首其所稱自殷周而歷秦漢迄于近代抑二千年末以鬼神自謂亦怪之甚者格之以清健飾之以俊麗一句一字若奮若搏彼建安詞人儻在不得居其右矣顏太師魯公愛之刻於巖際并有繼作李太尉衛公欽清遠之高致慕魯公之素尚又次而和之顏之叙事也典李之屬思也麗並一時之寡和又幽獨君詩二首亦甚奇愴余嗜古者觀而樂之因總而為和荅不知孰氏之作其辭古而悲亦存于篇末噫清遠道士果鬼神乎抑道家者流乎抑隱君子乎詞則已矣人則吾不知也○成道自哀周避世窮炎漢荆杞雖云梗煙霞尚容竄茲岑信靈異吾懷愜流詭古澀石鐵銼嵐重輕埃漫松膏膩幽逕蘋未著孤岸諸蘿幄幕暗衆鳥陶匏亂巖罅地中心海光天一半玄猿行列歸白雲次第散蟾蜍生夕景沆瀣餘清旦風人採幽什墨客學靈翰嗟余慕斯文一詠復三嘆顯晦雖不同茲吟粗堪贊陸

龜蒙追和一代先後賢聲容劇河漢況茲邁古士復
歷蒼崖竄辰經幾十萬邈與靈壽翫海獄尚推移都
鄙固燕漫羸僧下高閣獨鳥沒遠岸嘯初風雨來吟
餘鍾咽亂如何鍊精魂萬祀忽欲半不為斷臂憂肯
作秋柏散吾聞鄴宮內日月自昏旦左右脩文郎縱
橫灑篇翰斯人久溟溟得不長慕歎庶或有神交相
從重興贊陸龜蒙補沈恭子詩并序按清遠道士詩
題中有沈恭子同游既謂神怪之傳得非姓氏謚為
恭子乎趙宣子韓獻子之類邪恭子美謚也而詩中
有風流詞翰之稱豈獨唱而不和者歟疑闕其文以
為恭子之恨乃作一章存於編中亦補止之義也○
靈質貫軒昊遐年越商周自然失遠裔安得怨寡傳
我亦小國庠易名慚見優雖非放曠懷雅奉逍遙遊
攜手桂枝下屬詞山之幽風雨一以過林麓颯然秋
落日倚石坐天寒登古丘荒泉已無夕敗葉翳不流
亂翠缺月隱衰紅清露愁覽物性未逸反為情所囚

異材偶絕境佳藻窮冥搜虛傾寂寞音敢作雜珮訓
皎然陪陸長源裴樞遊武丘雲水夾雙刹遙疑涌平
陂入門見歲山元化何由窺曳組探詭怪停驂訪幽
奇情高氣為爽德暖春亦隨瑶草自的鑠黃樓爭蔽
虧金精發壞陵劍彩沈靈池一覽匝天界中峯步未
移應來遠公石列坐援松枝權德輿酬陸四十虎丘
對月東風變蘅薄時景日妍和更想千峯夜浩然幽
意多蕙香襲閑趾松露泣喬柯潭影漾霞月石床封
薜蘿夫君非歲時已負青冥姿龍虎一門咸淵深四
海推駁駁步騷褻婉婉翥長離玄圃盡瑤樹家林輕
桂枝聲榮徒外獎恬淡方自適逸氣凌顓清仁祠訪
金碧芊眠瑞草秀斷續雲竇滴芳訊發幽絨新詩此
良覲故人石渠署美價滿中朝落日杉松直芬芬蘭
杜飄雄詞鼓溟海曠度豁煙霄營道幸同街論心皆
後凋循環伐木詠緬邈招隱情慙茲擁腫才愛彼潺
湲清拘牽尚多故夢想何由并終結方外期不待華

髮生劉禹錫青林虎丘寺林際翠微路立見山僧來
遙從鳥飛處茲岑淪寶玉千載惟丘墓埋劍人空傳
鑿山龍已去捫蘿披翳蒼路轉夕陰遽虎嘯崖谷寒
猿鳴松杉暮徘徊北樓上海江窮一顧日映千里帆
鷗歸萬家樹慙因慙所適果得捐外慮庭暗棲還雲
簷香滴甘露久迷空寂理多為聲華故永欲投此山
餘生豈能誤又宿望海樓獨宿望海樓夜深珍木冷
僧房已閉戶山月方出嶺碧池涵劒彩寶剎搖星影
卻憶郡齋中虛眠此時景白居易森森怪石千僧坐靈池
入始深龍蟠松矯矯玉立竹森森怪石千僧坐靈池
一劒沈海當亭兩面山在寺中心酒熟憑花勸詩成
倩鳥吟寄言軒冕客此地好抽簪夜遊西武丘不厭
西山寺間來即一過舟船轉雲島樓閣出煙蘿路入
青松影門臨白月波魚跳驚秉燭猿覩怪鳴珂搖曳
雙紅袖娉婷十翠娥香花助羅綺鍾梵避笙歌領郡
時將久遊山數幾何一年十二度非少亦非多武丘

寺路自開山寺路水陸往來頻銀勒牽驕馬花船載
麗人芟荷生欲遍桃李種仍新好住湖堤上長留一
道春李紳秋山古寺東西遠竹院松門帳望同幽鳥
靜時侵徑月野烟消處滿林風塔分朱鴈餘霞外刹
對金螭落照中官備散寮身卻累往來慙謝二蓮宮
張籍望月登樓海氣昏劍池無底浸雲根老僧只恐
山移去日暮先教鎖寺門宋晁迴遊虎丘詩并序余
罷掌賦東陽歸次蘇臺時故人王士龍飲餞于閭門
且曰虎丘山寺吳中勝槩不越數里可能遊乎余沛
然恆心諾而偕往由枝派來水與嘯清風目遊趣棹
工叢力葉舟如飛拂白英以半開禁紅樹以傍出蓮
詣幽境夔無纖塵相與披煙蘿凌磴道杳疑天外作
為佛宮俯臨劍池呀若斷岸磊砢嶮嶭不能形容肆
凝覽以東周惜類景之西匿一觴一詠杞興而還遂
裁八章以表嘉會時淳化四載自序○餞別閬門復
少留故人邀我浣離愁旋酤美醞乘漁艇急棹斜陽

到虎丘千古劍池呀怪石一方金地枕清流歸時眷
戀情無限不得從容秉燭遊王禹偁蘇牆園著碧孱
顏曾是當年海湧山盡把好峯藏寺裏不教幽境落
人間劍池草色經冬在石座苔花自古斑珍重晉朝
吾祖宅一迴來此便忘還○樂天曾守郡酷愛虎丘
山一年十二度五馬來松關我今方吏隱心在雲水
間野性羣麋鹿忘機狎鷗鵬乘興即到興盡聊自
還不知使君貴何似長官閒○徒勞官職在天涯一
望家園一淚垂不是虎丘多勝槩拂衣歸去已多時
丁謂久塵黃閣侍威顏忽擁高牙出帝闕玉佩乍辭
大石陞錦衣重到虎丘山倦飈時傍潺湲起珍羽多
從杳靄還官大寵深難得暇林泉懷舊是偷閒梅詢
鳳池初下徙孱顏虎寺重遊啟舊闕金鉞傳呼授釣
渚賢天輝映讀書山卧龍昔日曾三顧遼鶴千年始
一還應為蒼生須再起草堂蘿幄詎容閒蘇耆虎踞
標靈跡危樓杳靄間劍池沈石壁金地湧秋山塔映

松軒斷雲迷蘚逕斑駁隨靈籟盡鶴伴老僧閒有句
慙先哲無辭愈厚顏我來聊寫望頓覺離人寰范仲
淹昔見虎耽耽今為佛子巖雲寒不出寺劍淨未離
潭幽步蘿垂徑高禪雪閉庵吳都十萬戶烟瓦亘東
南蔣堂林端生色美新晴樓閣依山若畫屏石坐最
宜人選勝劍池潛想地遺靈僧牕松竹冬尤茂寺路
煙霞畫亦冥自媿踰年假麾守一迴方得扣禪扃張
伯玉東客從來過虎丘橘花渡口維扁舟闔閭宮殿
不可見但對古塔寒颼颼憶昔吳王全盛日水犀十
萬橫吳鉤楚山既掘荆人塚越嶺仍將勾踐囚豈謂
西施能破國誰知麋鹿上臺遊惟有吳王在時月夜
深閒照劍池秋蘇舜欽重事飄然付一舟吳山蕭寺
且淹留白雲已有終身約醪酒聊驅萬古愁峽束蒼
淵深貯月巖排紅樹巧裝秋徘徊欲出向城市引領
烟蘿空自羞蘇軾入門無平田石路穿細嶺陰風生
澗壑古木翳潭井湛盧誰復見秋水光耿耿鐵花秀

巖壁殺氣噤蛙黽幽幽生公堂左右立頑礪當年或未信異類服精猛胡為百歲後仙鬼互馳騁竊然留清詩讀者為悲哽東軒有佳致雲水麗千頃熙熙覽生物春意破淒冷我來屬無事暖日相與永喜鵲翻初旦愁鶯蹲落景坐見漁樵還新月溪上影悟彼良自怡歸田行可請蒲宗孟長松遠步水灣環寺據吳王冢墓間瘦石千層開碧玉踈園十里褰青山壁從地上嶄巖起雲出門前自在閒零落生公講臺下無人說法但空還遊虎丘因書錢塘舊遊失卻湖山恨去舟新年無意作春遊東風昨夜思龍井曉雨全家入虎丘望見遠峯疑石街悞尋歸路認花樓明朝因出閭門去清夢遙知在兩州章子厚和閭閻城外小層巒瘦竹寒松數里間並岸逢僧知寺近入門鑿石漸登山鈍鉤劍化空池在幽獨詩成白日閒遊客幸無官事束何須齋舫到昏還○傳聞城角巖行舟自擁笙歌選勝遊偶為寒江阻潮汐再容清賞屬林丘

燕回吳苑風和雪夢斷錢塘月滿樓盡把蘇杭好烟
景醉吟將去詭東州方惟深晉人事高曠所得多奇
僻雲巖佛子廬曾為二王宅當時樂樂地俯仰成今
昔林泉亦余好徘徊相遺跡那知非昔人復作登臨
客孫覲大雪同羣兒遊虎丘冬溫陽久亢一雪意頗
快乘興泛扁舟出郭信如邁放棹得虎丘恍然銀色
界瑤山夾細逕瓊樹偃曲蓋引步到層樓極目吳城
隘飛鸞翔空中千峯羃天外景虛雲可凌寒重酒易
解羣兒慶老翁於此氣不憊○多病身如寄長負氣
自華只將窮事業便當老生涯泥飲醉生頰挑燈喜
見花慙慙香火社間病到毘耶禪客青鞋軟詩翁白
帽斜驚回蝶栩栩喜聽鵲查查推戶風敲竹登床雨
散花匆匆一笑許隻履上青霞葉夢得同程俱遊虎
丘得虎字我從山中來更覓林下侶常憂雲水脚臨
老浣塵土高堂老禪伯眉頰耀蓮宇號風一哮吼萬
竅為吞吐乘高寄遠覽城郭遙可數長波去渺滯積

潦斷梅雨從容半日會邂逅平生語亂石拱榭牙重
淵下深阻誰能望斗牛寶氣濯千古勿作李將軍彎
弓徒飲羽程俱得立字四顧渺平野孤撐見林丘常
疑湧地出儻復海所浮上有千人臺靈蹤想前修無
情肯深義頑石亦點頭下有百尺淵神光于斗牛陰
崖不見日草木皆先秋兩晉多達士東亭抑其流結
廬遠車馬寄此山之幽一朝施白足奔去如毛輶矧
伊桑下宿肯作賈胡留○尋壑復經丘人看李郭舟
藤花多背日桐葉最知秋虎去藜藿盡龍歸蛙黽愁
振衣臨石壁未羨習池遊方仲荀海湧起平田禪扉
古木間出城先見塔入寺始登山堂靜叅徒散巢喧
乳鶴還祖龍求寶劍曾此鑿孱頑范成大不過溪橋
又兩年偶隨筇竹訪幽禪有緣再踏雲巖路無處重
尋石井泉擬輟半山分座住先攜一枕借床眠覺來
飽吃紅蓮飯正是塘東稻熟天又致爽閣碧嶂橫陳
若斷鼇畫欄相對兩雄豪東軒只有雲千頃不似西

山爽氣高葉適虎丘之名歲二千虎丘之丘何眇然
衆山爭高隱日月笑此拳石埋平田雖然嵒嶺疑異
物劃開陰崖十丈懸冢中有恨索遺指亭上無語傳
枯禪偏是吳人愛山急逐面分方夸凭立屋承隋唐
良穩稱墨題熙豐尚新濕松梢莫遣風雨橫石盤自
添苔蘚澀春來春去吳人遊足顛屨顛踣應泣湯仲
友虎是何年踞名存迹已亡塔從林外出山向寺中
藏池暗生寒氣臺荒受夕陽更無人弔古來祇為春
忙元周馳茫茫句吳墟異阜萃然起諸天作藩屏樹
立空翠裏人言開闢初涌出自海底至今羅宮室意
與芝闕比夫差暴齊晉繼霸執牛耳金銀固九泉燼
國用奢侈投身甬東地委棄孰憐己因思人間世踊
躍徒為爾蒼茫一長望萬古遽如此日暮鍾磬間且
欲談至理張伯雨振履稍踐危援藤遂支滑尚餘金
玉氣山川相應發治吳不滿眼軒中樹如髮花覆闥
間城石繞生公榻適與幽人攜及茲暮春月坐久得

忘言移樽蔭清樾吳簡巨靈夜竊吳剛斧斲雲分得
蓬萊股巉巖老石甚雄武女媧不敢支天柱六丁移
近吳城傍土利剝蝕千風霜神膏迸鮮流玉漿碧泉
澄露飛金莖當時湛盧淬秋月西走荆秦南竄越館
娃宮成鋒即缺斷烟荒草長愁絕我來適興登高墟
浩歌醉倒黃金壺百年榮悴君知無西施未必能亡
吳倪瓚余適偶入城本是山中客舟經二王宅弔古
覽陳迹松陰始亭午嵐氣忽斂夕欲去仍裴徊題詩
滿苔壁高放與張憲金起王隅聯句飛梁上當空憲
直壁下插水兩樹交古陰啟孤亭倒清泚初至意已
愜憲再陟神亦靡氣銷淵龍藏起骨朽山虎死蒼崖
出鬼詩昭金藏閭僧史霸圖渺何在憲世事果如此
佳遊信難遭啟壯志良未已憑闌瞰神州起樹羽訝
軍壘未睹煙塵清隅且耽林壑美啟臨風揮一觥憲
藉草脫雙履鶯啄朱果殘啟蜂抱黃英委琴咽斜陽
蟬憲綦戰欲雨蝻潯暑避松簷啟輕涼透藤椅眯目

尋黑甜憲潛心玩玄旨籟響破虛寂啟香清飄旂旒
飯鍾隔煙來憲樵笛吹月起整轡戒僕夫起揖鞭謝
釋子龐聲吠喧呵隅騎影歸迤邐遺戀尚眷然啟重
來那復爾明發抗塵容憲何由繼芳趾啟又獨遊雲
巖寄周砬城西諸山非不奇我遊獨與茲山宜紅櫻
春開山後寺白水夏滿山前陂幽居況與山不遠鐘
鼓每到空齋帷雨餘烟中落日曳杖往讀頭陀碑
兩崖蒼蒼石色古杜杞樹高陰滿池殿燈欲昏上庫
巖塔鈴已靜蹲孤鷗興來即遊興盡返迎送豈要山
僧知困窮喪亂豈無感正賴此境忘吾悲嗟君何為
乃自苦破羈短策塵中馳掛帆能來亦未晚浦口三
日南風吹楊基層軒構崇丘綠樹帶吳苑鳩鳴春竹
靜鶴下烟汀遠初登已神暢稍久竟忘返松高急雨
過草弱微風偃幽潭閱靈跡氣濕龍蜿蜒俯深戒臨
危厯險知步蹇歸途極遐矚蒼茫失西巘釋良琦秋
日歸虎丘虎丘共作五年留幾度相攜上小舟楊柳

春橋半塘寺芙蓉夜月百花洲長林放鶴聞支遁一
室編蒲老睦州此日獨歸懷往事空山草色不勝秋
徐有貞雲巖雅集志天全翁自永昌歸吳三載於茲
矣閉門却掃非湖山之遊不出出則孤篷短棹飄然
往脩然還而未嘗有同遊同樂者甲申秋九月上日
自在居士自玉峯來始相約為登高之集約所登曰
山之近而佳者則武丘之雲巖乎約所集曰凡吾詩
社中人皆可也然不必期翌旦至者即與及旦而鹿
冠道人自東原至愛雲道人自牆東至醒庵未庵兩
文學至自綠水園翁乃與之載酒肴出閭門追及居
士於畫舫而長沙幕賓繼至遂即舫中張宴為水嬉
望山而進日卓午乃至而吾七人皆古衣冠步入山
門笑詠以登巖緇野褐盱眙相視迎而導之自麓及
巔凡臺殿亭館之有名者必造焉既乃遵鶴澗過松
庵循劍池躋雲閣列席而飲用司馬公真率會例酒
至自斟杯行無算于時黃花方盛開采英浮白薦以

紫萸綠橘而山珍海錯間之每酒行三五巡則一滌
以茗故雖酣而不醉醉而不亂問起而延佇巖阿憑
軒以眺邇而千章之松萬竿之竹雲作之色風作之
聲海濤怒鼓天籟和鳴目眩耳聾應接不暇遠而陽
華諸山自乾而離碑列車連衡絕乎莽蒼之野具區
之浸自坤而巽滙乎三江極乎雲海之涯塊北混茫
與天無際使人神爽飛越將興造化上下同流而無
間者因相與尋勾吳之遺跡乎閭閻之玄宮慕太伯
之至德企延陵之高風嗟霸圖之易泯而知有道者
之無窮也居士乃倡為四韻之詩庶冠繼之兩文學
繼之愛雲長沙又繼之而翁則旅酬而遍和之惟古
以菊節登高必以詩酒為樂事然能兼之者鮮矣孟
叅軍之於龍山有酒無詩陶徵士之於栗里有詩無
酒老杜之於藍田小杜之於齊山有詩有酒而無屬
和之什且彼晉唐中季人亂日滋其時不能無憂而
我輩幸當太平之世以時游衍而兼有詩酒賡酬之

樂然則斯集之雅蓋前此所未有也於是為志居士
為玉峯夏仲昭鹿冠為京兆杜用嘉愛雲為吳興施
堯卿醒庵未庵皆陳氏仲孟賢李孟英長沙為彭城
劉廣洋而翁則東海徐有貞云吳寬遊虎丘江神子
千人石上可中亭僧說法鬼來聽此事休談但愛石
峻嶒二十餘年身再到頭已白樹猶青劍池一道水
徧清檢泉經第三名斜陽休促客回城小閣半間重
徙倚蘇子語是詩銘又登千頃雲閣蘇公詩句舊曾
聞小閣猶題千頃雲故事流傳如昨日後人登覽感
斯文田苗盡繞平湖綠江樹遙從過雨分日晚窓間
頻拄笏西山佳氣正氤氲沈周雪中遊虎丘月色風
光知幾醉好奇重補雪中緣急排巖樹開高閣生怕
溪山又少年城郭萬家羣玉府塔簷半溜半
空泉香茶美酒如酬酢如此登臨亦可傳

陽山一名秦餘杭山一名萬安在城西北三十里高八

百五十餘丈逶迤二十餘里以其背陰面陽故曰陽亦云四飛以四面視之勢若飛動也大峯一十五而

箭缺為絕頂

相傳秦皇射於此故其下有射瀆

戰國策云越王以散

卒三千禽夫差於干隧今萬安山有遂山即其地也

箭缺下有文殊寺寺內石井大旱不涸有白龍洞嶺

西有龍母塚東北有白鶴山以丁令威宅名山產白

塏亦名白塏嶺又名白蓮峯以下有白蓮寺也今名

澄照寺其前有龍湫白龍廟在焉

高啟詩我登此山巔不知此山高但

覺羣山總在下坐撫其頂同兒曹又見太湖動我前
洶湧三十萬頃烟波濤長風吹人度層障不用仙翁
赤城杖峯迴秋礙海鷗飛日出夜聽天雞唱中有一
衆長不枯乃是蜿蜒神物之所都老藤陰森洞府黑
樹上不敢留棲鳥常年禱雨車來此投金符靈旗風
轉白日晦馬鬣一滴霑三吳巖巒蒼蒼境多異樵子
尋常不曾至探幽歷險未得歸忽聽鐘來澗西寺此
時望青冥脫畧塵世情白雲冉冉足下起如欲載我
昇天行古來名賢總何有唯有此山長不朽欲呼明
月海上來照把長生一瓢酒浮丘醉枕肱洪崖笑開
口天風吹落浩歌聲
地上行人盡回首

自此一支東北過金芝嶺曰管

山亦曰山北大石湧出如蓮花上有雲泉庵

國朝張淵史鑑

李應禎吳寬觀大石聯句巖巖者大石應禎奇觀人所
誦遐想十載餘寬來遊五人共舍舟始登陸淵杖策

不持輕是時日當夕鑑茲山氣逾滿入門信矣几應
拾級駭空洞落星何破碎寬靈鷲宜伯仲仰觀神欲
飛淵俯瞰心屢恐鱗皴苔薜剝骨立氷雪凍鑑神驅
道攜呵應積鬼劈文錯綜尊嚴凜君臨寬張拱儼賓送
環列畫兜孫淵擁護等僕從欲假愚公移鑑諒匪雍
伯種卧鼓慨桴亡應對白怯杵重猊叻呀未収寬龍
鬣怒難控凝血疑痛鞭淵立肺詎寬訟上漏還啟憲
鑑中遁自成術大惟補天功小可斫肌用分矢肅慎
來應積浮磬泗濱貢淵廉利並攢劍兀臬側倚甕嶧山
辱羸秦寬昆岳遺汴宋截彼民具瞻淵壯哉容難奉
鑑落照紅林赭歸雲白流永僧講點頭磨應積將射後
羽中塵緣契三生寬陣圖懷七縱淵在懸太師擊攻
玉詩人諷仙煮元腹飢鑑俗揩免腰痛瑤琨產惟揚
寬琅玕出乃雍高題少室名應積怪作東坡供半空見
玉蟠千仞附青鳳淵棲禪餘百年問僧僅三衆憑虛
圓曲闌寬架壑出飛棟竹幽補堂切鑑樹古嵌厓縫

竇黑炊烟熏麝坎平鍾乳壅盤盤棧道危寬灑灑水
泉動淵登頓足力疲眺望眼界空鑑松露髮欲濡潭
月手可弄寬窮攀任生皴麝醉吟微帶艷列坐對彎
跼淵大呼應鏗磬嗜癖牛李愚鑑詩戰鄒魯閑寬拜
奇得顛名憂墜成噩夢試與叩山靈儻來捐薄休寶
沈周大石狀望望泰餘杭首尾行不了大石突其尻
翹然一拳橋山體厚歲骨吐秀此特表正類抱中嬰
頭頂露於襟形大氣則散趣足喜在小其深雖未即
接目遠已好頃來莫能窮繼至敢草草循牆道林麓
記曲乃遺香登登覺向峻漸漸駕木杪倪峯據門左
呵禁口欲齧有蹬沿百級有殿嵌山造並殿跨偃石
懸身龍嫋矯行人自其下恍惚怖四爪轉高踏其背
股慄身亦掉鎮腦結佛序所仗力可援四壁滿題句
貴賤成雜掃同遊懲涉險旋踵促及早次尋巖間窅
蜂房互窈窕綠勢盡西向局地窄接榛雲登中貫穿
所歷平地少山靜日自長石瘠人亦褊坐僻覲居安

傳奇被遊攬陽厓詫唇歎陰竇疑目宵虛含風颺颺
濕映雲稍稍衆縐不可熨亂豐屯拆兆層疊百寶合
正紺或厠縹亘此金剛厓千古不可剿危椒壓屋脊
雷雨常怯倒草木亦作怪牢絳萬蘿薦蒼松長深縫
本矮枝節老斜見山桃花撒紅映叢篠草異傳多藥
采掇未諳曉欲宿償三過衾裯悔忘抱既夕氣更佳
延月象倍皎尚欠一踏雪意先有瑤島情狀要細述
言語未獲巧不期諸蟲兔拄腹早韞縢宛然紫芙蓉
被我一手拗東坡昔袖去援例我
非狹山僧苦著相便覺生煩惱

西為陽抱山西北

彭山溫山圖山皆近太湖其北竹青塘又北曰雞籠

山又北曰甌山

山巔有七竅如瓦甌故名

東南有象山即福壽山

盤迴不絕至南瓜山過爬石嶺而北曰北瓜山又徐

侯山在陽山西北十里一名卑猶一名徐枕吳越春

秋越王乃葬吳王以禮於秦餘杭山卑猶即此山也

越絕書云夫差冢在猶亭西卑猶位索隱曰猶亭亭名卑猶位三字共為地名其下有沈尤

村其西南出錦峯南出玉遮東南則鳳現嶺過嶺為

鳳凰山

晉太康二年掘地得石鳳故名

又南為賀九嶺

相傳吳王於此慶賀重九

崖壁有賀九嶺三大大字

過東南則為花山

花山舊名華山去陽山東南五里山石峭拔巖壑深秀

相傳山頂有池生千葉蓮服之羽化故名續圖經云

或登其顛見有狀如蓮華老子枕中記云吳西界有

華山可以度難疑即此也山半有池在絕巘橫浸山

腹逾數十丈故又名天池山

王璉詩清池穴山坳止水玻璃淨雲衣沉晴漣

天影涵空鏡龍歸海氣寒鳥度烟光暝銀漢此云通仙槎去非迴

上有石鼓晉隆安

中鳴乃有孫恩之亂

王璉詩石鼓從何來宛似岐陽璞具相若天成由來匪人鑿雨

辭上重輪天花蔭頑廓定出時有聲逢逢殷山角

石屋二間四壁皆鑿浮屠

像

王璉詩鑿石甕園庵結構因巖谷危梁琢堅珉濕礎裁寒玉梵相終無壞明燈自相續掘斷青山根

白雲長在屋

又有龜巢石秀屏虎跑泉蒼玉洞紹興中張

漢卿嘗居此號就隱山

楊備詩巖屏晚樹噪寒鴉巖翠樓臺釋子家池面鏡光功

德水金波影裏石蓮花范成大華山道中過午層陰未肯開暖寒村店竹篳灰蕭蕭林響棠梨戰晚恐陽山有雨來高啟靈峯可度難昔見井中書天池在其顛每出青芙蕖湛如玉女盆雲影含夕虛人靜時飲鹿水寒不生魚我來屬始春石壁烟霞舒灩灩月出後冷冷雪消餘再泛知神清一酌欣慮除何當逐流花遂造仙人居又陪姚叅政遊天池山騎馬尋幽度嶺避老僧不識使君誰門開紅葉林間寺泉浸青山石上池殘果已收猿食少枯松欲折鶻巢危壁間不用題名字無限蒼苔沒舊碑沈周遊天池山佛國有池峯頂見樓臺倒影入云云源道永海石中發氣接銀河天上分抱子龍君吟夜雨洗頭玉女動春雲詩腸一漉便歸去過其南為鹿山漢陽山野演山龍山嶺微鐘西日曛

茅山西有雞窠嶺清流山鹿山東南為龍池山今改

隆池自此過涅槃嶺遂接南峯山

即支硎山支龍

支硎山在龍池山東北以晉支遁嘗居此而山多平石

故名

按玉篇吳有臨硎吳都賦亦云石號臨硎又山按續圖支硎一名報恩山以昔有報恩寺也

有石室寒泉遁詩云石室可蔽身寒泉濯溫手相傳

遁冬居石室夏隱別峯也泉上刻紫巖居士虞廷臣

書寒泉二字徑丈

高啟詩遠落叢峯間平流盤石上月照欲成潭風吹不生浪聲兼寒

葉下色映秋苔漲野客照羸顏曾來倚筇杖

又有放鶴亭馬跡石皆以遁

得名

范成大詩石門關外古亭基樹老藤枯野徑微放鶴道人今不見故應人與鶴俱飛跨馬凌空

亦快哉龍腰鶴背謾徘徊遊人欲識仙蹤處但覓蒼崖白塔來山有南峯寺及中峯

北峯二院北峯宣德間移於雞窠嶺中峯在寒泉上

又名楞伽院南峯一名天峯即唐支山院也有碧琳

泉待月嶺南池新泉馬坡

本名養馬坡諺云馬婆泉者誤也

坡南有

石門乃三巨石直上干霄西連危峯東臨絕壑中猶

棖闌然又有牛頭峯在寺門之下東趾有觀音寺故

又云觀音山

白居易詩好是清涼地都無繫絆身晚晴宜野寺秋景屬閒人淨石堪敷坐寒

泉可濯巾自慚衰髻上猶帶郡庭塵宋葉夢得澤國
鍾下流有山獨西南標奇惜明眼夙昔多窮探腹背
眩金碧鐘魚牛精藍支郎放鶴地妙解無餘談高木
氣未炎綠陰正清酣我懶倦登陟茲行咤猶堪幽尋
雖云初佳處默已諳久欲謝塵滓往同彌勒龕平生
街九九晚識前三三才也實可人窮年玩烟嵐胷中
有定水萬境潛包含嚴霜掃頰紫老榦餘梗楠噉蔗
要自佳食茶亦云甘坐斲方丈室天雨花雨甕甕笑我
窘世網何如老眼蠶我今已解縛真理茶自耽但恐
愛山意多求尚成貪願借待月嶺重開石頭庵偃松
久傲兀碧琳故澄涵言
尋覺菴路更欲從徧參

定山在支硎西相傳支遁創報恩寺於其麓於此禪定

故云

按楞伽院石記云乾德二年當州奏帖付蘇州府西封定山龍宮里報恩寺敕賜觀音院舊志

疑定山即支硎之別號非也又按道林在吳土山墓
下集同意者合入闕齋時道士白衣凡二十四人道
林作詩三章越絕書土山者春申君治為貴人塚去
縣十六里疑即道林齋會之地去支硎為近豈即此
也按錢塘亦有其旁又有羊山與長洲縣分界
定山與此不同

高景山在定山羊山北三里自天平來漫衍數里至此

而止越絕書作高頸山

范成大詩卓筆峯前樹作團
天平嶺上石成闕綠陰匝地

無人過落日秋蟬滿四山又高景山夜歸伊軋藍輿
草露間夜涼月暗走屣顏忽逢波水明如鏡照見沈
沈倒影山其西麓對花山覺林厓谷盤拱處曰金盃塢宋魏

文靖公墓在焉其南為斜堰嶺

天平山在支硎南五里視諸山最為膏翠其林木亦秀

潤山多奇石詭異萬狀有卓筆峯

高啟詩雲來初似墨鴈過還成字千

載只書空山靈恨何事

飛來峯

高啟詩風吹蛾眉雲來依此山住我來不敢登只恐還飛去

五丈石

高啟詩勢危撐月墮影瘦倚雲平彷彿華峯井蓮花一半生

卧龍峯巾子

峯毛魚池大小石屋

高啟詩雙崖立幽關一洞開深宇青嶂近為隣白雲閒作主不

受杜陵風可避河朔暑華棟幾回新渠渠獨千古張羽山根攢棟宇簷梳勢峻嶒却許誰來住閒雲共老

僧其山頂正平曰望湖臺

即遠公庵遺跡

上巨石圓而面湖

者曰照湖鏡

楊基詩團團山上石下照太湖影如何一鑑中三萬六千頃

山半有

白雲泉

白居易詩天平山上白雲泉雲本無心水自閒何必奔衝下山去更添波浪向人間宋陳

純臣與范文正薦白雲泉書粵自剖判融結其中傑然高嶽巨浸不待標異固已聳動人耳目不幸出於窮幽之地必有名世君子發揮善價所以會稽平湖非賀知章不顯丹陽舊井非劉伯初不振惟胥臺古郡不三十里有山曰天平山山有泉曰白雲山高而深泉潔而清儻逍遙中人覽寂寞外景忽焉而來灑然忘懷礪北苑之一旌賡并州之新火可以醉陸羽之心激盧仝之思然後知康谷之靈惠山之英不足多尚天寶中白樂天出守吾鄉愛貴清泚以小詩詠題後之作者以樂天託諷雖遠而有未盡是使品第泉目者寂寂無聞蒙莊有云重言十七今言而十有七為天下之信非閭下而誰歟恭惟閣下性得泉之醇才猶泉之濬仁泉之勇智體泉之動霽是四雅鍾于一德又豈吝陽春之辭以發揮善價純臣先人

松檟寔彼一隅歲時往還嘗媿文辭窘澁不足為來
今之信僮閭下一漱牙齒之末臂牒發詠樂天如在
當斂策避道不任拳拳之誠范仲淹詩靈泉在天半
狂波不能侵神蛟穴其中渴虎不敢臨隱照涵秋碧
泓然一勺深游潤騰雲飛散作三日霖天造豈無意
神化安可尋挹之如醍醐盡得清涼心聞之異絲竹
不合哀樂音月明羣籟息涓涓度前林子晉罷雲笙
伯牙收五琴徘徊不擬去復發滄浪吟乃云堯湯歲
盈盈長若今萬里江海源千秋松檜陰茲馬如有價
北斗量黃金錢藻白雲巖靜最深隈泉溜泓容石竇
開宿霧不生澄曉月殘風輕颺蟄寒雷源從天漢星
邊落流自鑿峯海上回莫謂無心自奔注曾隨霖雨
下山來范成大龍頭高球嗽飛流玉醴甘渾
乳氣浮捫腹煑泉烹鬪勝真成騎鶴上揚州
別有一

泉如綫注出石罅尤清冽曰一線泉宋僧壽老始發

之范成大詩二十三年再入山此山與我有古松
前緣時人不用憐衰病天與丹房一線泉

螺糾如蓋者曰華蓋松俞焯詩次近勾陳第六星一
株相似色冥冥能眠獅子山

前路難比龍門石上形此十八公非草草後三千
歲獨青青來遊未怕遭風雨不用秦封請勒銘 又

有穿山洞蟾蜍石楊基詩神篆月中來化作千年
石曾吞玉杵霜清露時時滴 龍

頭石靈龜石及龍門高啟詩龍門何崢嶸此地表奇
蹟山分兩崖青天豁一罅白知

非禹功鑿想是鬼手擘長為風雨闕開闔自朝夕深
含未吐雲對峙不崩石日光寒易傾苔色陰更積只
疑過此內便與人境隔始窺己幽深漸及尤險窄暗
中把危藤蜿蜒欲驚魄僧留看古刻敲火照絕壁晚
聞松聲號洶若波浪激不知神魚飛到此誰點額我
嘗謁真龍天門謬通籍何必更區區求為李膺客

南趾有白雲寺范文正公祖墓在焉其西有筆架峯

其後羣石林立名萬笏林

宋周必大遊山錄五月丁亥早范至能顏休文相別

於閭門外唐致遠聯舟遠城望姑蘇館而過八里至橫塘又數里至黃山又數里過木瀆遂至靈巖院至能走价送薰香松黃新茶其簡云來日登天平須攀援至遠公亭及諸石屏處白雲泉名在水品其色凝白蓋乳泉也張又新以虎丘石井松江在第三第六而下此泉未知如何試一別之向壽老欲作亭泉上及別築遠公亭寺石上山路傍有石龜極形似向亦有名迹無知者忠烈廟具有文正以下畫像挂壁謁之丙辰早升小阜過天平下嶺甚峻約數里至白雲寺圖經云唐寶曆二年置在縣西南二十五里本遠錄公道場今范文正公功德院寺有白樂天蘇子美王君玉蔣希魯詩刻欲因致遠登山而脚力頗疲難

之然思至能簡中語恐遺恨他年遂奮衣右轉而上
酌白雲泉甚白而甘躡石磴至卓筆峯峯高數丈截
然立雙石之上附著甚輒疑其將墜餘如屏如矗
或插或倚備極奇怪行十六七里石愈衆而力愈憊
迺循左徑訪石屋三面壁立覆以二大石少休其中
下至小石屋一石覆之又下至飛來峯高二丈上銳
下侈後附盤石前臨崖谷茲其異也又東下遠公庵
一名望湖臺正直寺後又下至五丈石亦閣石上次
至頭陀巖有蓋斜蔽之次至龜石脊勢隱起名不虛
得此山大抵皆石也瑰形詭狀可喜可愕今日適疲
倦又當暑不能窮其巔然郡人能至予之所至者寡
矣況遊客乎歸寺欲拜文正及四子畫像坐待魚鱸
移時乃至明日蓋文正忌辰云高啟遊天平山記至
正二十二年九月九日積霜既霽顥氣澄肅予與同
志之友以登高之盟不可寒也乃治饌載醪相與指
天平山而遊馬山距城西南水行三十里至則捨舟

就輿經平林淺塢間傍竹石蒙翳有泉伏不見作冷
泠琴筑聲皆欣然停與聽久之而去至白雲寺謁魏
公祠憩遠公庵然後由其麓狙杙以上山多怪石若
卧若立若搏若噬蟠拏撐拄不可名狀復有泉出亂
石間曰白雲泉綫脉縈絡下墜千沼舉瓢酌嘗味極
甘冷泉上有亭名與泉同草木秀潤可蔭可息過此
則峯回磴盤十步一折委曲而上至於龍門兩崖並
峙若合而通窄險深黑過者側足其上有石屋二大
可坐十人小可坐六七人皆石穴空洞廣石覆之如
屋焉既入則凜然若將壓者遂相引以去至此蓋始
及山之半焉乃復離朋散伍競逐幽勝登者坐者哦
者嘯者憊而喘者恐而眺者怡然若有樂者悵然恍
仰感慨若有悲者雖所遇不同然莫不皆有得也予
居前益上覺石益怪迳益狹山之景益奇而余之力
益以憊矣顧後者不予繼乃獨褰裳奮武窮山之高
而止焉其上始平曠坦石為地拂石以坐則山之雲

浮浮天之風颼颼太湖之水渺乎其悠悠予超乎若
舉泊乎若休然後知山之不負於茲遊也既而欲下
失其故路樹隱石蔽愈索愈迷遂困於荒茆叢篠之
間時日欲暮大風忽來洞谷吟呀鳥獸鳴吼予心恐
俯下疾呼有樵者聞之遂相導以出至白雲亭復與
同遊者會衆莫不尤予好奇之過而予亦笑其怪怯
頽敗不能得茲山之絕勝也於是采菊汎酒樂飲將
半予啟言於衆曰今天下漾蕩十年之間諸侯不能
保其國大夫士不能保其家奔走離散於四方者多
矣而我與諸君在上者之力得安於田里撫佳節之
來臨登山以眺覽舉觴一醉豈易得哉然恐盛衰
之不常離合之難保也請書之石明年將復來使得
有所考焉蘇舜欽詩吳會括衆山戢戢不可數其間
號天平峻絕為之主傑然鎮西南羣嶺爭拱輔焉知
造化意不以屏大府清溪至峯前仰視勢飛舞偉石
如長人聚立欲言語捫蘿緣險磴爛熳松竹古山腰

有危亭前對翠壁舉石竇落玉泉泠泠四時雨願生
白雲間顏色若粉乳早年成播瀝潤可足九土奈何
但澄澈未為應龍取予方棄城中巖壑素自許盤桓
擇勝處至此快心膂養素聊自清終甘食於虎范成
大登天平山頂翠屏無路強攀援我與枯藤各半僂
不敢高聲天闕近人間漠漠但寒烟又重遊舊遊仿
拂記三年轟飲題詩夜滿山山上白雲應解笑又將
塵土沈朱顏高啟入山旭光迎出山月明送十里松
杉風吹醒塵土夢茲山凡幾到題字遍巖洞陽崖樹
冬榮陰谷泉夏凍怪石立誰扶靈草生豈種白雲翳
然來諸峯欲浮動高鶻有危樓幽禽無俗哢凌蘚知
履滑披嵐覺裘重嘗登最上巔遠見湖影空漁樵度
溪孤鳥鵲歸來衆還尋老僧居隔竹聽清誦慰我躋
扳勞為設茶筍供幾年歷憂歡造物若椰弄迷途遠
山林遲暮堪自訟難追謝公遊空發阮生慟身今解
組紱明時愧無用閒持九節筇尋討事狂縱石屋秋

可眠山猿許分共倪瓚天平爛熳遊三日林下狂吟
石上眠浩蕩春風芳草綠梅花雪滿白雲泉楊基細
雨茸茸濕棟花南風樹樹熟枇杷徐行不記山深淺
一路鶯啼送到家徐有負雨後遊天平諸峯滿庭芳
水長新波山橫爽氣朝來宿雨初晴動人清興紫翠
眼中明天也教吾快活要遊處便與完成最好是一
峯送過又見一峯迎有舟中絃管車前鼓吹隨飲隨
行路傍人觀了還笑還驚道是神仙神仙來也不道
是個老儒生知誰解浮
沈綠野裴度晚年情

其東為翁家山為雞籠山連

屬金山

高啟雨中過雞籠山春雲晦靄澗奔渾風雨
行人過一村得似山家深竹裏乳鳩啼午未

開門顧阿瑛寄琦元璞雞籠山下野人家破曉寫
詩邀品茶秋風過樹落紅葉夜雨滿溪流白沙

金山亦天平之支壠也初名茶塢山晉宋間鑿石得金

易今名頂上盤石有坎澗三尺許長二丈餘深不可
測水瑩綠大旱不涸人稱為天山腰有石橫偃於兩
崖人行其下其趾有育王塔方石池文殊菴在馬東
南為牛眠崦逶迤五六里直抵大河

國朝杜庠詩闕
問城外翠微間

揚子江心白浪灣踏破芒鞋
蹤跡徧始知人世兩金山

秦臺山在太平之右與笏林相隣巔峯大石刻秦臺二
大字相傳始皇遊會稽嘗登此故名一名晨臺又名
神臺其南則羊腸嶺嶺右為白羊山嶺之南為赤山

長可數里土石多赭色洪武初詩人楊基家其下

楊基赤山

舊事曾向溪南看藝麻竹扛兜子一肩斜秧荷尚短
仍含穀荷葉才高已上花蠶屋柘烟朝焙繭鵲爐沈
火畫薰茶而今風雨成拋絕卧聽西園兩部蛙○松
梢吹粉落衣裳躑躅花開竹筍長可是山中朝洗藥
一渠春水茯苓香又懷赤山舊業東林攜策處南垞
釋耕時一徑都緣石諸泉盡到池靜憐松響續涼愛
竹陰移歲世容歸隱母令解組遲○漸與世紛遠自
然塵慮消沼隨碧溪水徑渡綠陰橋岐路迷還識孤
村近却遙間身任
來往不為野人招

仰天山在赤山之東距天平不五里而近舊名馬鞍山

宋范文穆公成大營墓於此以近天平山且慕范文

正為人故改今名傍有覺巖寺為文穆奉祠之所今

廢

范成大重九日行營壽藏之地家山隨處可行楸

荷錨攜壺似醉劉總有千年鐵門限終須一個土
饅頭三輪世界猶灰劫四大形骸強首邱螻蟻烏鴛
何厚薄臨風拊掌菊花秋得壽藏於先隴之傍密邇
松楸地一隅會心何必問青烏元宗雖愧鎮周子沒
世尚從先大夫京兆漢阡賢聞望形山鄭冢儉規模
家庭遺訓庶萬在不學邠鄉畫古圖

靈巖山在天平山之南一名石鼓山

山椒有石鼓鳴則有兵禍又名硯石

山山連磧村產石可為硯故名

又有石馬望如人騎館娃宮在馬西

施洞響屨廊香水溪吳王井皆其跡也其詳互見古

跡山巔有琴臺刻字猶存又有硯池

高啟詩山骨誰鑿破一泓自然

默醉後欲濡毫蛇蛇見科斗陳子真湛湛冷山骨幽幽抱日光曉吟看雨氣春供給花香翫花池

山頂別有石池相傳生蔡純今不復見靈巖寺在焉

近燬惟一塔存耳

韋應物始入松路永獨欣山寺幽不知臨絕檻乃見西江流吳岫分

烟景楚甸散林工方悟闕塞渺重軫故園愁聞鐘戒歸騎憩澗惜良遊地疎泉谷狹春深草木稠茲焉賞未極清景期杪秋白樂天娃宮嫫廊尋已傾硯池香逕又欲平二三月時但草綠幾百年來空月明使君雖老頗多思攜觴領妓處處行今愁古恨入絲竹一曲涼州無限情直自當時到今日中間歌吹更無聲蘇舜欽古來興廢一愁人白髮僧歸掩寺門越相烟波空去鴈吳王宮闕半啼猿春風似舊花猶笑往事

多遺石不言惟有延陵逃遁去清風高節老乾坤宋
李復圭吳王昔日館娃宮殿閣鱗差軼碧空寂寂香
魂招不得惟餘松柏韻天風劉無降曉乘輕舸出江
城晚上籃輿卻倦行盡日松風響巖谷小窓聽作亂
泉聲胡珵攝身下蓬萊放浪雲水迹非無簡書畏心
賞寄泉石亭亭雲間塔勝地間白昔梯空上青冥如
鳥著兩翼化城出天半寶甃坦如席環山劃中斷裂
地開震澤我栽東西岑觀闕倚空碧千尋採香遙劒
卧連漪直當年館娃宮六月避暑夕琴臺延薰風萬
女曳阿錫牛耳爭齊盟鳥喙已著食百家甬東村託
足歸無宅馬知陵谷變大厦響千鳥知茲風塵際樓
殿踴山脊安隱大火中顯允像教力興予浩劫嘆萬
法本空寂元表易緒風散林薄洩霧開巖扃茲晨愜
清穆曠懷延杳冥九折度峻壁微行窮絕逕夫差昔
戾止鏘鏘駐和鈴華旗一以建綰紛朝百靈花飄墜
道白村入禪闌青吳娃壩方處越甲蔽長垌千秋魂

魄歸過沛涕亦零鳴吁重華後格鬪何由寧秦宮委
蔓草漢闕流寒螢惟應金仙安空山此亭亭摩尼耀
八極象教垂千齡周伯溫丹梯百尺到松林連抱庭
杉歲月深永巷廊虛曾響屨荒岡臺古不聞琴娥眉
傾國悲生樂麈尾談空後視今山下良田川似箭一
區那得老雲岑○重遊已隔十三春纖綠嬌黃幾度
新白髮無情添世態青山有約待詩人菜花間麥畦
擲錦薜荔縈藤樹簇鱗香逕斜陽啼杜宇舟迴圖月
掛城闌高啟間上青臺望下方漁村樵塢盡蒼蒼傾
城人遠苔生逕歸寺僧稀葉滿廊雲散池邊流塔影
雨來閣外失湖光廢興皆幻何須問獨自吟詩送夕
陽楊基單牖集羣英席窄坐每盞烟橫半掩寺木落
全見塔斜流出渠分曲逕轉簇合村粧妍醜並野話
悲笑雜童操吳音聞僧作梵偈荅霜苔滑難躋露棘
朽易拉磴紆螳綠樹靡敝蝸啟闔娛賓列五豆禮佛
過三帀晴崖暝憂雨秋洞寒疑臘窓攀盜果損簷入

避鷗鷺。掬池萍。沾袖憩石蘚。汚衲琴瑟忘。荒臺弄塵響。
回廊踏。值險慮。思筇得奇。即傾榼。感深怒。須磔愁。極
衰鬢。颯華年。倏川融。雅量慚海納。嘯歌激。款歡雄辯。
互交發。禪寂虛無量。道祖清靜蓋。品翼蝸觸蠻。變幻
雀化蛤。狂遊類飲酎。薄宦避嚼蠟。終當謝塵鞅。掃屋
分坐榻。徐有貞水龍吟。慢佳麗地。是吾鄉。看東山。更
比西山好。有卷畫樓臺。金碧巖扉。髻髻十洲三島。却
也有風流。安石清真逸。少向西施洞口。望湖亭畔。對
雲影。天光上下相涵。相照似寶鏡。裏翠蛾粧曉。且登
臨。且談笑。眼前事。幾多堪弔。香徑蹤消。塵廊聲宵。麋
鹿還遊未了也。莫管吳越興亡。為他煩惱。是非顛倒。
嘆宦海風波。幾人歸早。得在家中。老遇酒。美花新歌。
清舞妙儘開懷抱。又何須較短量長。此生心應自有。
天知道。醉呼童更進餘杯。便挨得到三更。乘月迴仙
棹。吳寬三十年來。續舊遊。莫春時節。水西頭。前朝古
蹟終難減。半日浮生得自由。鳥下林間。雙白羽。山橫

湖上兩青漚笛聲忽自琴
臺起落日都忘滯綵舟

玉遮山在陽山之南橫列如屏今但呼為遮山舊志為

查山

吳寬詩見山不識山借問山中人玉遮亦深秀
翠色聳嶙峋肩輿繞其趾面面松杉新峯巒稍

回伏穹窿復呈身細草被長岸盛夏
無埃塵乘閒即行樂願作茲山賓其南有按山化

山苦竹山其北有蜀山近光福鎮東南有貞山初名

燕山以其雲氣如炊也東有官山馬山又東為雅宜

山本名雅兒唐青州刺史張濟女雅兒葬此吳語兒

為倪因謠為宜或云虞集改今名傍有小山曰數姑

初名箸如近時居民掘地得唐元和十九年金氏墓

誌云葬於菽茹山陽始知其謠或云即雅宜山

倪瓚詩雅

宜山舊名娜如山蓋虞道園所命名然未若娜如之名近古也因爲竹枝歌二首○娜如山頭松柏青闔

閭城外短長亭來山未久入城去駐馬回看雲錦屏○娜如山頭日欲西採香逕裏竹雞啼南朝千古繁

華地康鹿蒿萊望眼迷

其東有朝山陂陀曼衍至奇禾嶺

一作岐荷

衆山連接不可名狀又東則五城山至金井塢又東

則真如塢與小白陽山相連

小白陽山一名伏龍山在金井塢南橫聳衆山之外山

址舊有寄心菴今廢其東南為博士塢彌陀嶺竺峯
嶺又東南則獅子巖在巘村之上又南則野芝塢皆
連屬靈巖山

錦峯山在陽山西南產石紫赤色而秀潤故名宋兵部
尚書鄭起潛居此淳祐中理宗書錦峯二字賜之其
西南則蜀山西北為新豐山

鄧尉山在光福里俗名光福山在錦峯西南與玄墓銅
坑諸山聯屬

按聖恩庵開山記作鄧尉山庵在玄墓山之南岡記作袁墓村蓋舊志以袁為

玄蔚為尉而名村以山耳後得宋
進士葉和甫墓誌與舊誌相合

其東有虎山鳳鳴

岡至理山北有龜峯光福寺在焉

吳寬昔年曾學登山法縱步不憂山

石滑舍輿徑上鳳岡頭起此涼風當晚發遠山朝士
抱牙笏迹山美人盤髻髮我身如在巨海中青浪低
昂出復沒山下人家遠市廛家家炊烟起曲突梅林
屋宇遙復見一似野鳥巢木末山僧見山如等閒翻
怪羣山競排閭偶憑高閣發長笑笑我胡為躡石鉢
夕陽滿目波洋洋西望平湖更空濶山靈為我報水
仙預役清冷供酒渴吳人非不好登山一宿山中便
愁絕扁舟連夜泊湖口舟子長篙未須刺懶遊已笑
斯人駭狂遊不學前輩達若耶其相連諸山有上崦
雲門在於越何必青鞋共布襪

有安山聚塢山朝士塢蟠螭山西磧山

在游湖南彈山即

小雞山在湖濱土阜也

登澤叢書小雞出胥門西行四十里過光福市市西五里

土多石寡無大林木

竺山

一名竹山

觀山茶山

即繡裘山也

吾家山茆岡

山石帆山褚山邢山游城山

在游湖北

長山皆附鄧尉山

楊基詩隨意扶筇入遠林紫藤花落逕苔深山

中莫道無音樂

一片鶯聲在綠陰

銅坑山在鄧尉山西南一名銅井晉宋間鑿坑取沙土

煎之皆成銅故名上有巖洞其懸溜漚而為池清冽

可飲名曰銅泉

張羽詩牽蘿陟雲崦想此盤陀石欲去更題名淋漓蘚花碧定有樵夫來

怪是龍蛇跡徐賁山行興未窮復登白雲嶠石上識會遊墨花破孤峭隣僧尚未見知有幽人到吳寬銅


坑山下徧楊梅曲徑人從樹杪來共
愛石橋涼似水湖梢未放酒船迴

玄墓山相傳郁泰玄葬此故名在鄧尉西南一名萬峯
山山之半南面太湖遠見法華山如屏浮於波面東
有米囤山與石牌至理諸山相連直抵呂山其西則
孫家蟲頭諸山迤邐入於湖心其南為周山

法華山在玄墓山南一名鉢盂一名烏鉢西南北三面
皆在湖中宋丞相李觀察墓在馬峯塢幽閒遊者鮮
至其東有橫山漁洋山迤邐數里與周山連屬

自陽山錦

峯而來至
此而止



姑蘇志卷八

欽定四庫全書

史部
姑蘇志卷十九

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李斯咏

謄錄監生_臣章玉輅

欽定四庫全書

姑蘇志卷九

明 王鏊 撰

山下

穹窿山比陽山尤高五湖賦云穹窿紆曲蓋此山實峻而深形如釵股吳地記兩嶺相趨名曰銅嶺越絕書為古赤松子取赤石脂處又神僊傳赤鬚子豐人秦穆公魚吏也食柏實石脂絕穀後往吳山升僊去即穹窿山也山高而平其頂方廣可百畝中壘石為龕

名國師庵半山有泉名法雨四時流不絕下注石堰
可以灌田山東嶺下有磐石高廣丈許相傳朱買臣
讀書其上後人號為讀書臺穹窿寺在焉其北有紫

藤塢百丈泉海雲菴西址有白馬寺

元陳徵詩綠水青山今再遊杜

鵲花發雨初收猿聲好在千章木雲氣深藏萬丈樓
麋鹿近人來古澗麒麟無主卧荒邱吏情益媿成羈
紲西望太湖烟際頭黃漢卿何處春山好物華穹窿
山下古烟霞出林澗水作清語上樹藤枝開紫花久
住老僧如避世初來塵容懶還家一尊醉倒東風裏
更寬砂鍋穀雨茶楊基昨日出遊今日還登臨未盡
湖東山紫藤花落高樹下翠羽鳴深竹間泉亭峻
石淨可掬磴倚絕壁危難攀人生跬步即天險不獨

瞿塘與劍關吳寬我聞吳中諺楊山高抵穹窿半壯
哉拔地五千仞始羨吳中有寺觀銅坑鄧尉仙屏宸
天平靈巖當几案其間法華與雅宜水透橫亘如長
岸何人著山經宜作吳山冠但嫌地勢高山家每憂
旱舟行半日青已了卻被濃雲忽遮斷水田路轉二
三里依舊諸峯青歷亂人云山頂百畝平合結茆廬
倚霄漢龍門勝迹未遑遊坐向船頭先飽看又飲百
丈泉白雲翻海濤行人渺無蹤蘭若因以名秀似青
芙蓉茲山非百丈泉石與山重問泉所發源寺僧偶
相逢涓涓出亂石號號循長松山中下鑿井飲足忘
瀾冬始知白雲多護此蜿蜒龍品評舊道園遺墨無
塵容所恨生已晚挾杖何由從步來當長夏坐挹清
心賀紀事強追和豈徒碧紗
籠謫仙詠瀑布莫訪香爐峯

香山與穹窿連屬南址近太湖為胥口而氣脈接胥山

吳地記云吳王種香於此遣美人採之故名其下有採香徑互見古跡西南數里有菑茅山臨太湖南址吳王愛姬祠在焉

胥山在太湖口寰宇記云吳王殺子胥投之於江吳人

立祠於此故名

水經云胥山上有壇長老云胥人所治也下有九折路南出太湖閭閻關

以遊姑蘇之臺而望太湖也

今太湖口為胥口其外為胥湖南有

高峯山

自穹窿至此止

姑蘇山一名姑胥一名姑餘在橫山西北古姑蘇臺在

其上至今人稱為胥臺山互見古跡

橫山在姑蘇山東隋書十道志云山四面皆橫故名又名踞湖山以山臨太湖若箕踞也錢氏葬忠獻王元璵於此建寺其趾曰薦福因又稱薦福山山有五塢故又名五塢山皇祐五年節度推官馬雲遊此山名之曰芳桂塢飛泉塢脩竹塢丹霞塢白雲塢後人又以堪輿家言稱為九龍塢山中舊有朱桓陸雲公顧野王墳續圖經云此山鎮郡西南臨湖控越實吳時

要地隋遷郡於橫山亦以是為屏蔽云

馬雲詩山臨太湖上寺隱

青蘿間五塢洞壑邃衆峯屏障環濃嵐面光彩驚波
背潺湲雲歸定僧寂月伴樵夫還林墅掩蒙密級磴
容躋攀錢氏建圭社此地為家山又題五塢森森芳
桂樹團團削青玉春花飛澗戶秋實墜巖曲霜條封
翠紫風葉搖香綠下有幽棲人結芳避世俗學仙讀
丹經好道探藥錄植根滿羣峯不使樵斧觸○高崖
落飛泉深源味冷冽雲津留玉乳石髓澄金屑淙淙
危磴響滴瀉蒼蘚缺澱沫灑明珠滿澗融寒雪巖夫
就漱飲姪子臨沆瀣不獨愈痼疾自可清內熱○檀
藥徧巖川幽谷氣象鮮風生自宮徵秋籟成管弦夕
靄起碧霧晨曦生綠烟花繁紫鳳飽質勁蒼虬攣藤
蘿交密蔭仰不見雲天欲訪桃源路塢塢疑相連○
東澗簇谷秀粲然金碧麗亘夜丹氣明向曙麻烟霽
磴瀉紅玉泉林紆赤鳳髻日出諸峯上月皎半天際

幽谷紆絳繒層崖縈錦綢羨此山居人蕭然遠塵世
○君尋白雲塢最近林澗西永日抱幽石因風度清
磔炎隨夏景變涼高秋氣淒素霑生巖寧練光帶虹
霓潤澤施天下還返故山棲深惟賢士志出處可與
齊又仇山人隱居雞犬眠雲白日空暮春花木滿川
紅茶甌香沸松林火藥杵聲清石澗風玉帛未聞招
隱士神仙今喜識臺翁夕陽半局殘棋在醉倚巖邊
紫桂叢高啟題五塢欲攀淮南樹人去山寂寞嫋嫋
涼風生疎花月中落○山空響更遠雨過流還急餘
沫麗迴風一林紅樹濕○色暎磧沈沈秋雲生夕陰
無限楚山意鶴鳴風滿林○遙聞丹霞塢中有殘霞
者絡彩發朝朝還同赤城下○雲間見家山雲合失
山路聞語知有
人欲尋已迷誤

其西有岷山花園山堯峯山唐免水
院在焉今稱堯峯寺有清輝軒碧玉治多境巖寶雲

井白龍洞觀音巖偃蓋松妙高峯東齋西隱十景今

並廢

蔣堂半峯亭詩何名半峯亭堯峯路之半游客趨層崖斗上多股戰竇雲構茲軒接引心不倦

所冀冠蓋來少休松石畔雄視金仙居巍采倚銀漢自此更攀緣須臾躋彼岸李彌大雲峯何岩堯去天餘幾丈其下蔚華林幽然屹相向我遊先朝瞰海日射中杖飛蓋不須持步步蒼松障山僧知我來羅立見鴈行提携兩行人為我談實相一種勿絃琴三嘆無聲唱開軒面東南千里入俯仰西登妙高臺更欲茲曠望土斷澤遶山烟濤渺雲浪恐是六鼇連蓬壺墮莽蒼又疑鯨入海偃脊起青嶂時方老火熾金石流玉煬須臾變雲雨為作雄風壯翻手回涼秋掀舞千林響誰云免水宮自是神龍藏三高如可作吾欲五湖訪洗足巨浸心振衣孤峯上寄詩夸奪流得飽但相忘長哦可當歌踏月下空曠僧懷深山居十詠

清輝軒湛湛平湖沒月明漁歌吹斷曉風清
環衣蒙頂跣趺坐不稱詩情稱道情碧玉
洛深靜舍秋一鏡寬清甘聊酌齒牙寒靈
巖自笑窮山骨明月泉慳只欲乾多境巖
聊向蒼藤掛玉環蒲莎嘉致伴幽閒雙
眸淨洗看不厭欲結遮頭草一間寶雲井
寶雲珠草廣禪林鑿石窮源意亦深長嘆
甘泉不當路汪汪空有濟人心白龍洞古
洞深沈莫敢窺森陰草木野雲飛白龍何
處淹頭角天下蒼生待汝歸觀音巖笑日
野花青嶂下歌春幽鳥白雲間寶陀大士
全身露懽惱遊人空看山偃蓋松寒松門
底如張蓋接引佳賓眼倍青方丈老人迎
送少未應因汝下幽庭妙高峯下視羣山
盡子孫孤高直與月輪分喜財不用別峯
覓只此休時見德雲東齋禪板蒲團消永
日明窓淨几映疎筠一爐香盡六時過轉
覺山家氣味真西隱匿影長嫌山未深
閑門莫放俗塵生如今滿眼事奔走欲向
何人話此心戴良已從錨泉游復向堯峯
去

堯峯渺何所塵俗不知處披拂強追尋疲癯窘凌遽
息喘倚茂松濟勝犯零露積石擁近蹊飛嵐護遙樹
仰觀天宇垂俯睨河流注石湖尚波濶洞庭但烟霧
游子多悲懷觸景增遠慕微跡既漂泊流年復遲暮
半生僅一來百齡能幾度又西為鴨踏嶺反陂山其
回駕悵難淹又復首前路

南有寶華山長旗嶺其東有感慈塢又東為吳山本
亦橫山一支吳越廣陵王子文舉建吳山院於此故
名其南有昇猶山桃花塢漫衍六七里臨太湖白楊
灣與吳江分界山之東有紫薇塢瑞雲塢褒忠嶺青
霞塢北連梅灣西址為殊勝塢山西有陸墓山疑即

陸雲公葬處

楞伽山一名上方山在吳山東北其頂有浮圖五通廟在其下東南麓有丁家山唐人丁公著父喪負土作冢故名其北為寶積山寶積寺在焉其北為吳王郊臺東北為茶磨嶼以其三面臨水故云嶼俗云磨盤山東南麓有普陀巖巖前石池深峻崖絕石梁跨其上兩崖壁立蘿木交映特為奇勝

白石山在許墅北越絕書云故為胥女山春申君初封

吳更今名又云其南有小蜀山春申君客衛公子冢也

黃山在茶磨山北四里胥塘之北諸峯高下相連俗稱筆格山隋志載王世充破劉元進坑其衆於黃亭礮疑即此山其西山之半有二石洞深可三四丈俗名虎洞

峯寧山在金山東俗稱獅子山以形名一名鶴阜山又名峯雄山吳地記云王僚葬此山傍有思益寺山上

有石巷山南有大石相傳為墜星

今其東有落星涇

水經云

吳西有苻嶺山

俗傳此山本在太湖禹治水移至此又西南有兩小山皆有石如卷苻禹

所用牽山也吳山有淺處在三山之南長老云是苻嶺山麓自此以東差深言是牽山之溝朱伯原謂牽

山事問巷之談因故書所載姑存之山石有土阜曰鈴山左曰索山皆

以獅子名山南頂上有巨石二如樓云是獅子兩耳

自元以來鑿石且盡

徐有貞登獅山麥黃天氣爽如秋乘興聊為窄窄遊香徑踏花

來洞口小舟送酒過饌頭橫塘樹色連龍塢茂苑烟光接虎丘絕勝竹林觴詠處即今誰數晉風流

何山在獅山北一里其地舊名鶴邑墟故山名鶴阜山

因梁隱士何求何點葬此改今名其坡有資福寺范志

以岑寧山為鶴阜山以上四山與諸山不相連

洞庭山在太湖中一名包山以四面水包之故名或又

謂包公嘗居之

陶隱居云包公為句容人鮑靚

又名林屋山山週迴

一百三十五里遙望一島而重岡複嶺茂林平野鍾

梵相聞閭巷井舍不異市邑即其地如人區別境其

諸峯皆秀異而縹緲峯最高登其顛則吳越諸山隱

隱在目又有上方下方石公龍頭金鐸

相傳吳王藏金鐸於此

渡渚

吳王嘗於此渡軍

諸山雖皆山之支隴而逶迤起伏靈

棲邃構隨高下各擅勝處有名叢林凡十有八而林

屋洞毛公壇桃花塢消夏灣卷裏諸迹尤為奇勝唐

房琯云不遊興德洞庭未見山水他名人品題尤多

其地相傳無虎蛇雉而所產柑橘特佳所謂洞庭柑

也

皮日休詩松門亘五里彩翠高下絢幽人共躋攀勝事頗清便雲霧林上雨隱隱湖中電薜帶輕束

腰荷笠低遮面濕屨黏烟霧穿衣落霜霰笑次度巖壑困中過臺殿老僧三四人梵字十數卷地稀無夏屋境僻近朝膳散髮抵泉流支頤數雲片坐石忽忘起捫蘿不知倦異蝶時似錦幽禽或如鈿策夢還憂

刃并欄自搖扇俗態既斗藪野情空眷戀道人摘芝
菌為余備午饌渴興石榴羹飢歷胡麻飯如何事于
役茲遊急於傳却將塵土衣一任瀑絲濺又縹緲峯
頭頂華陽帽手持大夏笻清晨悟道侶來上縹緲峯
帶露嗅藥蔓和雲尋鹿蹤時驚魴鼉飛上千丈松
翠碧內有室叩之虛磬磬古穴下徹海視之寒鴻濛
過歇有佳思綠危無倦容須臾到絕頂似鳥穿樊籠
恐足蹈海日疑身凌天風衆岫點巨浸四方接圓穹
似將青螺髻撒在明月中片白作越分孤嵐為吳宮
一陣霰黷氣隱隱生湖東激雷與波起狂電將日紅
礫礫雨點大金鷗轟下空暴光隔雲閃髣髴亘天龍
連拳百丈尾下拔湖之洪梓為一雲山欲與昭回通
移時却握下細碎衡與萬人物諒不測絕景尤難窮
杖策下反照漸聞仙觀鍾烟波瀆肌骨雲壑闌心胷
竟死愛未足當生且歡逢不然把天爵自拜太湖公
又桃花塢黃緣廣南嶺盡日穿林樾窮深到茲塢逸

興轉超忽塢名雖然在不見桃花發恐是武陵溪自
閑仙日月倚牽小精舍當嶺殘耕出將洞任迴環把
雲姿披拂間禽啼叫篠險狹眼碑砢微風吹重嵐碧
埃輕勃勃清陰減鶴睡秀色治人渴敲竹鬪鉞弄
泉爭咽啞空齋蒸柏葉野飯調石髮空羨塢中人終
身無履韉陸龜蒙和包山信神仙主者上真職及棲
鍾梵侶又是清涼域乃知烟霞地絕俗無不得巖間
一逕分柏擁深殿黑僧間若圖畫像古非彫刻海客
施明珠湘鞋料淨食有魚皆玉尾有鳥盡金臆手攜
鞞鐸佉若在中印國千峯殘雨過萬籟清且極此時
空寂心可以遺智識知君戰求勝尚倚功名力却下
聽經圖孤帆有行色左右皆跳峯孤峯挺然起因思
縹緲稱乃在虛無裏清晨躋澄道便是孱顏始據石
即更歌遇泉還徙倚花奇忽如薦樹曲渾成几樂靜
烟靄知忘機猿猱喜頻攀峻過斗未造平如砥舉手
緣青冥迴眸聊下眎高帆大於鳥廣墀纔類蟻就此

微茫中爭先未常已。葛洪話剛氣去地四十里。苟能
乘之遊止若道路耳。吾將自峯頂便可朝帝宸。盡欲
活羣生不唯私。一已超騎明月輪。復弄華星藥。却下
蓬萊巔。重窺清淺水。身為大塊客。自號天隨子。他日
向華陽。敲雲問名氏。○行行問絕境。貴與名相親。空
經桃花塢。不見秦時人。願起為東風。吹起枝上春。願
此作流水。漸浮藥中塵。願此為好鳥。得棲花際隣。願
此作幽蝶。得隨花下賓。朝為照花日。暮作涵花津。試
為探花士。出作偷桃臣。桃源不我棄。庶可全天真。王
禹偁吳山無此秀。乘暇一遊之。萬頃湖光裏。千家橘
熟時。平看月上早。遠覺鳥歸遲。近古誰真賞。白雲應
得知。范成大滿載清閒一棹孤。長風相送入仙都。莫
愁懷抱無消豁。縹緲峯頭望太湖。高啟朝登西巖望
太湖。青天在水雲飛孤。洞庭縹緲兩峯出。正是碧海
浮方壺。嘗聞此山孤。靈壤蛇虎絕。蹟歡樵夫濤聲半
夜恐。魂夢石氣五月寒。肌膚居人彷彿武陵客。戶種

客就收為租高風欲起沙鳥避明月未出霜猿呼中
有林屋仙所都銀房石室開金鋪羅浮蛾眉互通達
別有路往非人途天后每降龍垂胡神鉦忽響驚棲
鸞自懸日月照洞內古木陰蔽空朝暘風吹白芝晚
易老雲帶紫泉秋不孤靈威丈人亦仙徒深入探得
函中符玄衣使者不暇惜欲使出拯蒼生蘇後來好
事多繼往石壁篆刻猶堪慕千年玉甌化蝙蝠下撲
短火如飛鳥玄闕拒閉誰復到似怪石上腥塵汙勿
言神仙是恍惚靈蹟具在良非誣我生擾擾胡為乎
坐見白髮生頭顱久欲尋真未能去局束世故緣妻
孥何當臨湖借漁艇拍浪徑渡先雙鳬獨攀幽險不
用扶身佩五岳真形圖夜登天壇掃落葉自取薪水
供丹爐此身願作仙家奴不知
仙家肯許無狂語醉發應胡盧

莫釐山相傳莫釐將軍所居一名胥母音以其在洞庭

之東稱東洞庭山其山周迴八十里視西洞庭差小
而岡巒起伏廬聚物產大畧相同所不同者西石清
而潤東石黃而燥西宜梨東宜枇杷西有兔無雉東
有雉無兔耳山有九寺法海翠峰靈源最勝

范成大鎮下啟

船過東山打頭風急鼻雷鼾醉夢間心鐵石頑惟有
愛山貪未厭西山纔了又東山吳寬登百階棧望西
山百階棧上望西山縱目遙過消夏灣未遂真游勞
指點聊憑高興去躋板石壇相距纔十里林屋都來
有萬間報與山靈須少
待會將親手扣仙關

鼇頭山一名鼇山實洞庭支嶺也以其形類鼇故名山

產奇石

禹期山亦洞庭支嶺相傳禹會諸侯於此

夫椒山相傳夫差敗越處

按左傳吳伐越敗之夫椒杜預曰太湖中椒山水經云太

湖有包山春秋謂之夫椒史記正義引賀循會稽記云夫椒山在太湖中洞庭山西北又常州志云夫椒一名湫山在無錫縣太湖濱

津里山

橫山 陰山 葉余山 長沙山

已上在西洞庭之北

衡山 漫山

在長沙之西

武山在東洞庭之東本名虎山相傳吳王養虎於此後

避唐諱改今名

余山

在東洞庭北

三山

厥山

澤山

俱在東洞庭西南

馬跡山在太湖中屬武進縣

錢堆山

大岫山

小岫山

獨山

與錫山相傳中斷為太湖

東鴨山

西鴨山

三峯山

大峯山

小峯山

小椒山

與夫椒相對而差小

杜圻山相傳范蠡乘舟至此遇風止釣洲上刻石記焉

自錢堆以下俱在馬跡山西北

大貢山小貢山

元王逢望大小貢二山大貢如大人小貢如小臣大人方正笏小臣亦垂紳太

湖七十山而此我所珍清淑萃間氣端厚凝風神嶽路蓮一朶海偃月半輪遠分馬迹秀近奪蛾眉真岫幌散素夕雲蓋擁高晨深容虎豹隱幽絕孤兔隣將軍雖相望邈若越與秦我行柯村外紫翠忽鮮新不無靈異棲飛度招隱淪洵洵白水波杳杳清路塵芳萼被中沚采之淚盈巾父老昧知識謂我諸侯賓我豈諸侯賓均是天王民

五石浮山 茆浮山

思夫山相傳秦時有人採藥不返其妻思之至死故名

高啟詩江上曾看望夫石湖中望見憶夫山夫君好采山中藥獨得長生竟不還不似蕭郎與秦女乘鸞

同去綵雲間

南烏山 北烏山

大雷山小雷山兩山相對而不相見見則有風雷之異

大千山 小千山 紹山 青浮山 曠浮山

東嶽山西嶽山相傳吳王於此置男女二嶽也

粥山相傳吳王飼囚於此

琴山 杵山 大竹山 小竹山 長浮山

癩頭浮山 殿前浮山 龜山

與龜山相對而差小

謝姑山 小謝姑山 玉柱山 金庭山 垓山

舍山 歷耳山 筆格山 石蛇山 鼉山

小鼉山 驚藍山 箭浮山 王舍山 苧浮山

白浮山 筠帽山 貓鼠山 石脾山

已上七十二山並在太湖中

馬鞍山在崑山縣西北廣袤三里高七十丈一名崑山

實因華亭之崑山而名縣境連接湖海而孤峯特秀

上有浮圖

近歲火焚其頂

其陽有慧聚寺東偏有山神祠西

有文筆峯

相傳孝宗時有魁星見於此

山巔有華藏寺南有桃源

洞北有鳳凰石及春風亭

太常卿夏景建

正統間知縣羅永

年植柏千章名郎官栢

宋滕繼一水決辰外乍晴如酒醒臨嶺照淨練陟巘到高

青翠雷俯深樹黃雲迷遠坳超然信塵表風袂襲冷泠孫寔絕頂地平易軒牕風怒號半空垂象緯四面湧波濤洞僻荒苔蘚泉深冷骨毛登臨欲忘返城市厭煩勞楊維禎與顧仲瑛姚子章張叔厚于彥成鄭

九成聯句二月二十日樓船下婁江破浪擊長艫楊
驚颺簸高杠梅峯遙古色姚石樹鳴悲腔躡磴履齒
齒張登堂鼓逢達地險立孤柱邾天垂開八窻烏升
海光浴于鴛鴦風力降番賦夾閨估顧越詔雜吳隴
仙樵推結萃姚胡佛凹眉龐婆律噴獅鼎楊琉璃照
龍缸曾軒坐疊浪邾落筆飛流淙愛此韞玉石豈曰
取火硯文脉貫琬琰顧密韻含麗缸驅羊欲成葛楊
種壁得無雙多今文章伯張萃此禮義邦龍駒幸識
陸姚鳳雛亦知龐翠筭掉文舌顧蒨衲折幔幢歛思
抽連繭雄心鬬孤縱句神躍冶劒才捷下水舩磬聲
重寡和鼎力輕羣扛昆
渠詩已就誰誦隴頭瀧

秦柱山在縣南三十里千墩浦南帶海上有烽火樓基
吳時以望海冠吳錄云一名秦望山又輿地志云秦

始皇嘗登因名

唐薛據登秦望山南登秦望山目極大海空朝陽半蕩浴晃朗天水紅縹

壑爭噴薄江湖遞交通而多漁商客不悟歲月窮振
縉迎早潮弭棹候遠風予本萍泛者乘流任西東茫
茫天際帆柁泊何時同將
尋會稽迹從此訪任公

媧婦山在縣東十八里

趙靈山在縣西南三十里

已上三山蓋土山耳
因舊志所載姑存之

千墩在縣東南其北三十里地名木瓜有墩九百九十
有九與此合為千墩因名千墩浦一說自淞江抵本
府東下至江南之北凡有千墩永樂中太常少卿袁

汝被旨浚千墩浦鄉民便之易名少卿墩

綽墩在縣西十八里相傳唐黃幡綽所葬

高啟詩淳于曾解救齊城

優孟還能念楚卿嗟爾只教天子笑不言憂在祿兒兵

天女墩在縣東南十八里洪莊村

墩上下皆茆葦惟中間一路若有人行者

雖植草不生相傳有天子之女葬於此莫詳世代墩中有金龍舟每風雨夕即聞金鼓聲一村民夜過其處見所謂龍舟者攫取之僅得一人像長可尺許暨歸即大病嘗有人欲發此為毒蜂飛火逐之遂止

青墩

塘墩

在縣東北海口一在東南三十六里吳淞江南

尖墩

石墩

十八里墩

廟墩

湯墩

相墩

逃鹿墩

長墩

虞山在常熟縣西北一里高一百六十丈周四十六里

六十六步

吳地記云孫權置虞農都尉於此故云按吳越春秋吳太子娶齊女病而曰必葬我

虞山之巔以望齊國越絕書云虞山巫咸所居則虞山吳越時已有之或云虞仲葬此得名一名

海虞或云海嵎

以東臨滄海

又名烏目山雖無峯巒而蜿

蜒起伏畧如卧龍上有土垠硯礪或疑其古塚而不

可考也山麓有老君殿舊名乾元宮宮側有池

宋嘉定間

鑿所

又有雪井南有仲雍墓有維摩庵太公石屋旁有

石洞天將雨則雲氣出其中又西北為拂水巖崖石

陟峻水奔注如虹凌風飛濺最為奇勝自南循山而
西有致道觀又西有招真宮昭明太子讀書臺在焉
又西則嶽祠諸廟過吳王廟五六里有試劍石又有
三沓石與石城石門諸峯錯峙下有石壇周八十步
又西則寶嚴灣其北六里為破山

孫應時詩長嘯虞山迴天開風氣清

南窺五湖近北覽大江橫歷歷三吳地悠悠萬古情
雄觀有如此聊復記平生王汝玉平生不識海虞山
覽秀曾因圖畫間雲入空濛開倒影僧依蒼翠閉禪
闕湖田種熟秋千頃烟浦舟行路幾灣天上歸來暫
停轡何當留我老年閒吳寬與沈周遊虞山夜宿相
川口清朝喚舟人舟人請所之指彼虞山垠山如知

我來笑迓野水濱，藹藹春雨餘。翠洗雲中身，我亦重
茲山。疎然正冠中，虞仲骨已朽。高名宛如新，悠悠松
間路。弔古在茲晨，放舟轉山塘。行行自知津，春服亦
既成。庶以適此春，我本不飲人。愛山如愛酒，春遊
亦易事。出戶即擗肘，決策為此行。所幸得良友，譬彼
足力弱。扶掖乃能走，虞山遙在望。豈意落吾手，側足
亂石間。縱目平湖口，賞心雖云樂。弔古悵然久，丹井
事有無。刻銘覆華構，如何梁昭明。書臺蔽林藪，斜
日下嶺西。落霞滿川上，晚色催人還。輕舟復遙漾，佳
山難為別。持酒忽惆悵，悠然一回首。舟尾疊青浪，故
人知我懷。捉筆寫其狀，懷土心未除。移山力何壯，便
如王維詩。終南亦堪望，流觀入中夜。鼓柁起高唱，又
舟中望虞山。蜿蜒平野卧，青山相見令人獨。厚顏徒
有詩，篇曾記詠已無筋。力再躋攀船頭旋轉，憑黃帽
水而低回。擬翠鬟舊日同遊，誰在者。欲從東老學清
閒，沈周只有看山是勝緣。青鞋布襪且輕便，天叔雨

脚賒今日我起花時遣老年絕壁雲扶將墮石豁崖
風勒下奔泉此來不憤空歸去旋構新篇揀竹鐫

破山世傳龍鬪而山破故名上有興福寺又有鬪龍澗

旁有硃砂洞放生池慶元志引山海經曰虞山之北

岡墮相接即烏目山

今頂山之南有烏目澗疑即此也

自此東北九

十步有空心潭

取唐人常建詩潭影空人心之句

又有舜井

唐僧常達山居

八詠身閒依祖寺志僻性多慵少室遺真肯層樓起
暮鍾啜茶思好水對月數諸峯有問山中趣庭前是
古松○晚望虛庭物心心見祖情烟開分嶽色雨霽
減泉聲遠樹猿長嘯層巖日乍明更堪論的意林下
筍新生○一室塵埃外翛然祇麼常睡來開寢帳鍾
動下禪牀溪浸山光冷秋凋木葉黃時提祖師意欽

石看斜陽。西來真祖意祇在見聞中。寒鴈一聲過
疎林。幾葉空心閒。憐水石身老怯霜風。為報參玄者
山。山月色同。真性寂無機。塵塵祖佛。師日明庭砌
暖。霜苦藥苗衰。汲水和烟酌。栽松帶雪移。好聽玄旨
處。猿嘯嶺南枝。古寺凭欄危。時聞舉妙機。庭空月
色淨。夜迴磬聲稀。漏轉寒更急。燈殘冷焰微。太虛同
萬象。相謂話玄微。聖僧論的旨。物物唱圓成。疎柳
春來翠。幽牕日漸明。禪心清石室。蝶翅覆花英。好聽
譚玄處。喬松鶴數聲。祖祖唯心旨。春融日正長。霜
輕莎草綠。風細藥苗香。月滿真如淨。花開覺樹芳。庭
前鶯囀處。時聽語圓常。宋劉拯破山八詠并序元豐
元年蘇州常熟縣沙門思雅謁余言曰海虞之勝鍾
於破山。然林泉之勢游觀之繁無近與遠傳之盛矣
自倪郴州捨宅為寺數百年間偉人奇士往往間出
而人無知者。願有以發明之余。因而詠興。福寺我
烏目山。曾臨賞侯宅。重房昔珠翠。峻宇煥金碧。泉激

晨霞明松搖暮雲白宜爾山中人日輪自朝夕文舉
塔圓昔探雙林巖言發南華萬里歸一空誰云正非
邪門影搖青松曾迴貴侯車猶遺數層塔岌岌凌飛
霞救虎閣三昧遊深慈結宇依蒼崖猛虎伏巍閣拔
箭非忘骸窮獸雖覆車危雀猶投懷況我見已忘而
彼猶其儕龍鬪澗白龍鬪巍峯長澗落千尺靈泉應
奇躋高連莫雲碧寒影凌蒼崖清流動危石八月苗
正枯猶能變甘澤體如塔妙理悟三伊巍巍抗奇節
千尺巖下松蕭然獨凌雪珠影雖青黃月輪豈圓闕
危石揚寒泉至今伴清絕宗教院妙義傳天台迷雲
淨如掃初終雖五時修短自三草結隱非此峯獲藏
亦真寶秋來月正圓獨照松已老空心潭碧潭發幽
石瀟灑無纖塵寒光湛秋月有物無比倫離釣沉無
魚千尺徒垂綸到此心已空何用濯吾纓御賜鍾大
聲叩洪鍾萬里來彤庭鳥間棲影重星淡雲氣清餘
響遶巖壑林葉如迴驚有客發深省塵耳非謾傾

頂山在破山北十二里上有高女峯

相傳齊景公女葬此

白龍池

在焉西北有水簾洞兩水合流從石厓下注漫流若

簾云

孫應時詩小山搖落故淒涼想像登臨野興長萬里晴空初鴈入一年好景又橙黃極須痛飲

償秋節生怕疎鍾報夕陽搔首故園歸未得籬邊寒菊為誰香。散目秋郊趁晚涼纖雲不點鏡天長松杉沐露連天碧杭稻眠雲萬頃黃可惜文書妨勝日又還時節近重陽小山叢桂相撩得故故隨人作陣香梅詩千株碧樹插雲立一綫紅泉透石飛童子怕寒爭閉戶夜深風雨有龍歸范仲淹平湖數百里隱然一山起中有白龍泉可洗人間耳吾仰仁智心愛茲山水音結茅三十年不道歲月深笑我名未已來問無為理却指嶺邊雲斯馬贈君子周霞賓路轉清風徑泉通古石橋規模靈隱小景像上方遙書壁藤

牽袂尋源草沒腰每懷
登覽日東海暮生潮

福山在縣治西北四十里高九十五丈周五里本名覆

釜唐天寶六載改為金鳳後梁乾化三年又改今名

山麓有東嶽行祠

徐有貞詩冒雨衝風泛綠舟共君
載酒七峯遊海門東望天連水江

市西來樹隱洲喜有錢劉新著作能無王謝
舊風流登樓莫漫題詩句留與山僧作話頭

壽山與福山相連北濱大江又名陶山

河陽山一名鳳凰山在縣西北四十里高一百二十丈

周七里山頂有井嘗出醴水

見永慶寺碑

又有梁朝古檣

及唐狀元陸器讀書臺

陳繹曾平生邱壑愛躋攀此日披圖意任閒江浙去題龍

虎榜海虞行看鳳凰山鶴來華表千年後雲在丹崖萬壑間聞有青囊書卷在訪仙求術待扶還楊維禎河陽山色畫圖開絕壑懸崖亦壯哉華表不聞仙鶴語醴泉曾引鳳凰來玉魚金盃埋黃土石獸豐碑長綠苔獨有桓桓邱隴在秀峯相對讀書臺

志山與河陽山相峙

按廬志居民鑿地得唐斷碑有驚山之語則志當作驚

塔山在河陽山南晉處士夏統宣城太守郗臻嘗居此

舊名崇德後改今名

常熟山在縣北三十七里高一百五丈周七里本名銅

官或云洞觀唐天寶六載改今名

范山在縣北三十六里二百步高七十四丈周二百四步相傳梁范冀兄弟居此故名又永安山在縣北三

十八里

或云即范山

石家山高五十七丈周二里在銅官山北

茯苓山在縣西北六十五里高數丈周三百步下有龍

潭

石闕猶存

相傳舊產茯苓故名

宛山

或作苑

在縣西南五十里高七十丈周五里產石堅

潤可為硯

顧山在縣西北五十里高一百七十丈周二十一里東南屬本縣西南屬無錫縣西屬江陰俗呼為三界山一名靈龜山亦曰香山

烏丘山在縣東南二十七里去昆承湖三里或作塢山

黃土山在魏涇橋南

三山皆土阜耳

穿山高一十七丈周二百五十步中有石洞前後通徹故名臨海記曰海虞縣穿山下有洞穴高十餘丈昔

有海行者舉帆經其中今考其洞上猶通人往來而其下為地去海已遠舊屬常熟今分隸太倉州

太倉岡身在州治之東曰上岡身曰下岡身曰歸胡岡

身

今名歸吳

在新安鄉曰青岡在惠安鄉曰王家岡別有

岡門見水條

寶山在嘉定縣東南八十里依仁鄉永樂十年三月平

江伯陳瑄督海運築為表識上建烽火高三十餘丈

周迴一十五里

御制寶山之碑嘉定涉海之墟當流之會外即滄溟浩渺無際凡海舶往

來最為衝要然無大山高嶼以為之表識遇晝晴風
靜舟徐而入則安坐無虞其或暮夜烟雲晦冥長風
巨浪帆檣迅疾倏忽千里舟師弗戒瞬息差失觸堅
膠淺過取顛躓朕恒慮之今年春乃命將士相地之
宜築上山焉以為往來之望其址東西各廣百丈南
北如之高三十餘丈上建烽燧晝則舉烟夜則明火
海洋空濶遙見千里於是或樂其便不旬日而成周
圍樹以嘉木間以花竹蔚然奇觀先是未築之前居
民恒見其地有山影及是築成適在其處如民之所
見者衆曰是盖有神明以相之故其兆先見皆稱之
曰寶山因民之言仍其名而不易遂刻石以誌之詩
曰滄溟巨浪渺無分混含天地相吐吞洪濤駕山嶽
奔巨靈顛顛相噓歔揮霍變化朝為昏駭神褫鬼目
點睂蒼黃拊髀孰為援乃起茲山當海門孤高靚秀猶
崑崙千里示表鬱燁燁永令汎濟無憂煩寶山之名
萬古存勒銘悠久同乾坤永樂五年五月初九日



姑蘇志卷九